

文

三峯集
二

九步...
上...
...
中...

三峯集卷之三目錄

疏

上恭讓王疏

箋

到南陽謝上箋

撰進 御諱表德說箋

撰進朝鮮經國典箋

書

上鄭達可書

登羅州東樓諭父老書

上遼東諸位大人書

上都堂書

啓

到南陽上密直司啓

序

送胡長老詩序

贈祖明上人詩序

河相國春亭詩序

賀河公生子詩序

送趙生赴舉序

贈典校金副令詩序

贈任鎮撫詩序

送楊廣按廉庾正郎詩序

送宋判官赴任漢陽詩序

若齋遺藁序

圃隱奉使藁序

送華嚴宗師友雲詩序

陶隱文集序

送靖安君赴京師詩序

三

11

三峯集卷之三

奉化 鄭道傳 著

疏

上恭讓王疏

辛未四月○按恭讓王求言教曰

在求言昔宋景一言之善致焚惑三舍之靈
天人之際感應斯速予以眇躬荷祖宗之靈
託臣民之上憂勤風夜期底豐平而智能不
逮學問不明其於政教動昧施為若涉大川
罔知收濟今者日官上言乾文示儆客星孛
于紫微火曜入于輿鬼變異甚鉅兢惕益深
將涼德未修而不孚於帝心與政令有闕而
不協於輿望歟刑賞之道有乖於正歟任用
之人或徇於私歟下情未盡達而冤抑有所
未伸歟民弊未盡除而財用有所妄費歟茂
異之才未舉者誰歟讒佞之徒未斥者誰歟
如斯之弊豈予一人所能徧察肆開讜直之

路以消壅蔽之風藹藹之言亦有可採矧卿
大夫百執事之臣共天位食天祿者哉茲欲
共新於治化庶以仰答於天心於戲賞罰明
而禮樂興陰陽和而風雨時吏稱其職民樂
其生其要安在知而不言不可謂之仁言而
不盡不可謂之直惟爾大小臣僚並上實封
寡躬過誤時改得失民間利病毋有所諱其
言可用予卽有賞言而不中亦不加罪事見

麗史

政堂文學臣鄭道傳伏讀教書上以謹天文之變下
以求臣庶之言而以八事自責臣讀之再三不勝感
歎殿下以天之譴告引而歸之於已開廣言路冀聞
過失雖古哲王未之或過也臣待罪宰相無所匡輔
以貽君父之憂至煩教諭之丁寧臣實赧焉嘗謂君

爲元首臣爲股肱比之人身實一體也故君倡則臣和臣言則君聽或曰可或曰不可期於致治而已然則天之譴告由臣所致也古者有災異三公策免爲大臣者亦避位而讓一本作禳之請免臣職以弭災異然念古之大臣當請退之時必有陳戒之辭况今獲奉教書安敢不效一得之愚仰備採擇之萬一伏讀教書曰涼德未修而不孚於帝心歟政令有闕而未協於輿望歟臣愚以爲德者得也得於心也政者正也正其身也然所謂德者有得於稟賦之初者有得於修爲之後者殿下大度寬洪天性慈仁得於稟賦之

初者然也殿下平日未嘗讀書以考聖賢之成法未嘗處事以知當世之通務安敢保德之必修政之無闕也漢成帝臨朝淵默有人君之度無補漢室之亡梁武帝臨死刑涕泣不食有慈仁之聞不救江南之亂徒有天質之美而無德政之修故也伏望殿下母以稟賦之善自恃而以修爲之未至者爲戒則德修而政舉矣伏讀教書曰任用之人或徇於私歟賞罰之道有戾於正歟臣愚以爲任用之人出於公私在殿下自知之耳臣何足知之然除目旣下外人目而議之曰某也故舊也某也外戚也外議如此臣恐徇

於私者雜之也賞者勸有功也刑者懲有罪也賞曰
 天命刑曰天討言天以賞刑之柄付之人君為人君
 者代天而行之耳賞刑雖曰出於人君固非人君所
 得私而出入之也殿下即位以來蒙賞受刑之人有
 事同而施異者金侂之言按先是遷辛禍于驪興大
副令鄭得厚潛往見之禍泣曰得一力士害李侍
中吾事可濟仍授一劍使郭忠輔舉事忠輔佯諾而
告我太祖因行鞠之侂曰邊安烈李琳禹玄寶一
禹仁烈王安德禹洪壽共謀迎驅興王為內應
 也有置于極刑者有加擢用者按謂誅邊安烈擢金
 宗衍在獄致逃按金宗衍事見附錄事實一也其監守官吏一誅
 一用按時宗衍在逃不獲以防禁不嚴斬當直令其
史因巡撫李士穎于巡軍卒乃釋而用之

在

一本有兩在字

逃

謀亂一也同謀容接

一本作隱

之人或生或

死

按生者禹玄寶等死者尹有麟崔公哲等也

臣愚不知刑誅而死者為

有罪耶則擢用而生者獨何幸歟擢用而生者為無

罪耶則刑誅而死者獨何幸歟禍昌竊我王氏之位

實祖宗之罪人而為王氏之子孫臣庶所共讎也其

族姻黨與不加刑誅則屏諸四裔而後快於人神之

心昔武才人以高宗之后奪其子中宗之位五王舉

義退武氏復立中宗武氏母也中宗子也以母之親

奪子之位胡氏尚譏五王不能斷大義誅其罪而滅

其宗况禍昌之於王氏無武氏之親有武氏之罪則

族姻及其黨與奚啻武氏之宗也頃者臺諫上言逐

之於外

按恭讓已已諫官論李穡等罪流之於外

縱不能明示天誅庶幾

小雪祖宗臣庶之憤也曾未數月俱承寵召聚會京

城出入無禁今雖以諫官之言放其數人殿下黽勉

從之有遲留顧惜之意不知此舉果何義也諸將回

軍議立王氏此上天悔禍

舊本作過

祖宗陰相王氏復興

之機也有沮其議卒立子昌使王氏不復興者

指李穡

有謀迎幸禍永絕王氏者其為亂賊之黨王法所不

容也殿下既全其生置之遠方可也今皆召還于家

慰而安之

按恭讓庚午宵為玄寶李穡等任便居住

若以其罪為誣也其

沮王氏而立爲昌者諸將之所共知也親自招服明
有辭證其迎幸禍而絕王氏者金仔鄭得厚言之於
前李琳李貴生招一作承於後辭證甚明此而謂之
誣也天下安有亂臣賊子之可討者也大抵人之所
爲不合於公議則必有合於私情殿下此舉以爲合
於公議則禍昌之黨皆祖宗之罪人也以爲合於私
情則留禍昌之黨以遺後日之患如尹彛李初之請
親王動天下兵亦何便於人情哉若曰有罪者赦之
恩莫大焉佗日必得其力矣人心自安而禍亂自止
矣臣愚以爲刑法所以禁亂也人君所恃以存安者

也刑法一搖禁亂之具先毀力未得而禍先至心未
安而亂不止矣請以中宗三思之事明之武氏之黨
最用事者三思中宗以母之親姪誅討不加待遇甚
厚自今觀之五王既立武氏之子爲帝故三思得免
其机上之肉則五王不惟有功於中宗於三思亦有
天地再造之恩也彼三思曾不是思自疑其罪爲世
所不與日夜譖五王曰權重恃功以惑中宗之心中
宗以三思愛己而親之以五王爲權重而忌之五王
日踈三思日密卒之五王戮而中宗弒使中宗謬計
不過曰不能保全功臣而已豈知親見弒於三思之

手乎以親則母之姪也以恩則活其生也不得其力而得其禍讒人之難保也如此讒人之謀其初不過自保其身而已爲惡不止則馴致其道至於亾人之身滅人家國以底自敗而後已如三思者豈有古今之殊也天人之際間不容髮吉凶災祥各以類應今內則百官受職庶民安業外則上國和通島夷讐服亂何由生讒人交構於下則虞憂之象著於上客星孛于紫微臣恐三思之在於側也火曜入于輿鬼臣恐終有三思之禍也臣等雖遭五王之害無足恤也爲王氏已成之業惜之也若曰保無此事言之者妄

也彼中宗之心豈不爲保也卒貽後人之笑臣恐後人之笑今猶今之笑古也董子曰天心仁愛人君先出災異以譴告之欲其恐懼修省之也伏望殿下當用人刑人之際不論其親疎貴賤一視其功罪之有無處之各當其可使不相陵則任用公而賞罰正人事得而天道順矣伏讀教書曰民弊未除而財用妄費歟下情未達而冤抑未伸歟茂異之才未舉者誰歟讒佞之徒未斥者誰歟臣聞三司會計佛神之用居多焉財用之妄費者莫斯若也然佛神之害自古難辨也爲其徒者曰此好事也善事也歸我者國可

富也民可壽也爲人君者聞是說而樂之殫其財力
諂事佛神人有言之者則以爲我事佛而彼非之我
善而彼惡也我道而彼魔也我之事佛神爲富國也
爲壽民也非爲我也持是說以固其心而人之言莫
得以入也殿下卽位以來道場高峙於宮禁法席常
設於佛宇道殿之醺無時巫堂之祀煩瀆此殿下以
爲善事而不知其實非善事以爲富國而不知國實
瘠以爲壽民而不知民實窮雖有言之者舉皆不納
不自以爲拂諫是臣所謂爲善福壽之說先入之也
昔梁武帝屈萬乘之尊三舍身爲寺家奴殫江南之

財力大起佛塔其心豈以爲非利而苟爲之也匹夫
作亂身遭羈辱子孫不保而國家隨之佛氏所謂修
善得福者果安在哉此猶異代也玄陵崇尚佛教親
執弟子之禮於髡禿之人宮中之百高座演福之文
殊會無歲無之雲菴之金碧輝映山谷影殿之棟宇
聳干霄漢財殫力竭力竭舊本作竭怨讟並興而皆不恤
事佛可謂至矣卒不獲福豈非明鑑乎周末神降于
有莘太史過曰國家將興聽於人國家將亡聽於神
周果以亡由是言之事佛事神無利而有害可知矣
伏望殿下申命有司除祀典所載外凡中外淫恠諂

瀆之舉一皆禁斷則財用節而無所妄費矣殿下卽
位以來人或犯罪有不問者有放免者疑若無冤抑
之未伸者也然赦者姦人之幸良善之賊也則其數
赦乃冤抑之所在也近者臺諫以宗社大計上書論
執皆遭放逐臣恐冤抑之未伸茂才之未舉者此其
時也至於讒佞之人蹤跡詭秘言語隱密難可得而
料也大抵君有過則明爭之人有罪則面折之落落
不合矯矯獨立不畏佞人之議者正士也秘其蹤跡
惟懼人知在衆不言獨對浸潤者讒佞之人也殿下
於外而士大夫內而小臣宦寺試以臣言觀之讒佞

之情可得矣人雖至愚皆知自愛至於妻子之計孰
無是心昔漢成帝時日有食之言者皆以為外戚用
事之象成帝疑之問於張禹禹以身老而子孫微弱
恐得禍於外戚不明言其故卒使王莽移漢鼎谷永
輩直攻成帝略無忌憚至於王氏之用事畏避不言
漢室卒以亾亦為妻子計而不暇及漢室也按麗史
無是心下有昔漢成帝以下臣雖狂妄不至病風敢
九十四字佚於本集今添入不自恤乎臣以一身孤立於羣怨之中非不知言出
而禍至然殿下以不諱問臣敢不以切直對此臣所
以寧得禍而不恤切言而不諱者也伏望殿下留神

採擇以白臣忘身徇公之意萬死無憾

箋

到南陽謝上箋

乙丑

道傳蒙恩除南陽府使已於今月十七日到任上訖
祇承綸命出守海鄉愧感交駢因知所措竊念以臣
之微本無寸長蒙先王之知擢從臣之列當逆眈伏
罪告謝太室俾臣考校鐘律肄習祭儀比及卒事禮
無愆違先王稱之曰能禮曹學官命臣兼之仍尚符
寶視草誥院恩至渥也及先王棄羣臣臣於是時以
禮儀郎職掌禮務承命廟堂糾合百官以定大業殿

下初卽位庶政俱新除臣成均司藝藝文應教知製
教蒙恩召入書筵講大學書呈穆穆文王於緝熙敬
止其於爲人君止於仁爲人臣止於敬爲人父止於
慈爲人子止於孝與國人交止於信懇懇辨論以致
丁寧殿下納之臣感知遇之恩言無避諱觸忤時宰
斥去南荒間關炎瘴濱於死者幾至三年例徙于鄉
又過四年許於京外從所便安是則殿下賜臣以再
生甘自分於閑散爲盛代之逸民歲在甲子殿下命
門下評理鄭夢周賀天壽聖節臣爲書狀官奉表朝
京師前此二三行李皆被拘畱存亡未知在廷之臣

憚莫肯行臣從鄭評理受命卽行達于金陵不失其
期朝聘始通拘留者歸是在殿下事大以誠羣臣奉
承之勤也臣何力之有焉使還之日卽授臣成均祭
酒知製教殿下請承襲則俾臣草表文迎詔誥則俾
臣習儀注天子嘉之曰表辭誠切使臣稱之曰禮儀
可觀方今文理盛開儒臣林立顧臣何人獨有是榮
此又殿下賜臣以不朽也惟典校寺本秘書省圖書
所在讎校任重謂臣有學爲令於是書生之榮其亦
極矣顧惟臣營生謀拙食貧口衆故求外寄以盡餘
年豈期求退而資益高辭榮而寵自至茲蓋伏遇主

上殿下以忠信體羣下諒臣志之無佗也臣敢不益
勵駑鈍宣上德意撫綏疲瘵之餘民仰酬洪造之萬

一
撰進

御諱表德說箋壬申

臣言今月十日伏蒙都承旨臣閔汝翼傳奉 王旨
令臣撰到表德投進臣聞唐帝以堯為名其號曰放
勲虞舜之重華夏禹之文命皆其號也至周文盛有
名則有字天子諸侯皆字之曰某甫卿大夫以下亦
然由是觀之幼則名之冠則字之所以別長幼而責
成人之道也恭惟 殿下卽位之初更名某告于

天子則 天子受之告于 宗廟則 宗廟饗之名

之所在實必從之今人謂字曰表德德其實也盛德
如天之日非小臣所能摹擬然青天白日有目者所
共覩臣敢竭愚慮請以 君晉為獻臣謹按從日從

一日出之始也晉明升之義天日之升其明廣照而
陰翳消釋萬象昭然即人君初政之清明而羣邪屏
息萬法俱新也天日既升其明漸進即人君始自踐
阼傳于千萬世也詩曰如日之升是也伏望 殿下
體周雅之格言動法於日循是名而致是實不勝幸
甚

撰進朝鮮經國典故

甲戌

奮義佐命開國功臣輔國崇祿大夫判三司事同判
都評議使司事兼判尙瑞司事修文殿大學士知經
筵藝文春秋館事判義興三軍府事世子貳師奉化
伯臣鄭道傳臣言伏承都承旨臣尙敬爲臣具啓令
臣投進所撰朝鮮經國典故奉教投進者兼錄膺圖肇
啓鴻休之運立經陳紀以詒燕翼之謀敍成周六官
之名建朝鮮一代之典恭惟 主上殿下體天之德
保位以仁定國號以繫民心立儲副以隆邦本 世
系著積累之慶教書頒寬大之恩謂治道責成於相

臣而貞賦實歸於公用制禮作樂以和神人講武修
兵以正邦國刑則詰姦而禁暴工則謹度而課程可
見創業垂統之艱難俾爲持盈守成之悠久宜載汗
簡以藏名山臣以庸疎獲叨遭遇庶將著作之末技
仰答生成之至恩盛德豐功固難備述大綱小紀悉
皆鋪張謹繕寫朝鮮經國典隨箋以獻伏望 聖慈
幸當燕閒時賜觀覽雖未助於緝熙之學少有取於
施設之宜臣無任激切屏營之至頓首頓首謹言

書

上鄭達可書

異端曰盛吾道曰衰驅民於禽獸之域陷民於塗炭之中四海滔滔未有紀極嗚呼痛哉伊誰正之必也學術之正德位之達爲人所信服者然後可以正之矣且下民昏愚不知取舍苟有一時之達者闢之則去之倡之則和之此蓋但知達者之爲所信服而不知道之有邪正也昔孟子雖窮而在下卒能闢楊墨尊孔氏而天下從之蓋以德達而其德足以信服乎天下也蕭衍雖昏而無知卒能興佛教易風俗而天下從之蓋以位達而其位足以信服乎天下也孔子曰君子之德風小人之德草草上之風必偃其是之

謂歟自是以來上無賢君下無真儒世教陵夷邪說橫流達而在上者又從而倡之嗚呼其弊有不可勝言者矣及宋之盛真儒迭興挾遺經繼絕統扶斯道闢異端而學者靡然從之斯亦以德達而爲人所信服故也惜乎有德無位不能大行於世永絕邪說之根本也然而中國學士尚賴其說莫不以扶斯道闢異端爲己任雖其弊之深也不能遽絕尚可望夫斯道之復振也若東方則其弊尤甚人皆好之篤而奉之謹又號爲大儒者反爲讚誦歌詠助揚聲勢鼓舞振動彼下民之昏愚惟從達者之好者爲如何也於

是先王之學寂寥無聞耳目所接無非異端襁褓孩
兒學語之始卽誦其言嬉戲之時便設其儀習與性
成恬不知非邪與心熟堅不可破雖聰明之士眩惑
其空玄暴悖之人喜懼其禍福莫不尊奉依歸毀倫
滅理風俗頽敗傾家破產父子離散其禽獸之歸塗
炭之苦亦不可旣矣幸茲秉彝極天罔墜雖在波頽
之中尚有一二明經之士深知其害竊議而私歎之
往往辨之於人則或有所聽信而開悟之者是理義
之心人皆有之矣然下焉不尊民卒不從及與爲佛
者辨之則彼亦有是心自知其非屢至辭窮然恥爲

之屈惟務自勝援引公卿之尊奉大儒之讚誦以折
辨者乃曰夫豈不義而某公信之以某公之位之德
而尊奉讚誦如此汝反非之汝能賢於某公歟辨者
若曰位爲公卿而於道有不學號爲大儒而於學有
不正但當質諸本心辨其邪正而已豈以某公之故
而遽以此爲是云爾則爲有說矣然此不惟獲以下
訕上之罪人反不信以爲狂妄譏笑毀謗使無所容
辨者默然無言彼爲佛者意氣洋洋自以爲吾說勝
也是知異端之邪不可以口舌爭也下民之惑不可
以義理曉也惟其學術之正德位之達爲人所信服

者然後可以正矣吾友達可其人也達可雖無其位
達可之學學者素服其正也達可之德學者素服其
達也以予昏庸不恤譏議慨然有志於闢異端者亦
以達可爲之依歸也天生達可其斯道之福歟近聞
往來之言達可看楞嚴似佞佛者也予曰不看楞嚴
曷知其說之邪達可看楞嚴欲得其病而藥之非好
其道而欲精之也旣而私自語曰吾保達可必不佞
佛然昌黎一與太顛言後世遂以爲口實達可爲人
所信服其所爲繫於斯道之廢興不可不自重也且
下民昏愚易惑難曉達可幸思之

登羅州東樓諭父老書

錦南雜題
〇乙卯

道傳以言事忤宰相放來會津縣縣羅屬也道過羅
 登東樓徘徊瞻眺山川之勝人物之富庶抑南方一
 巨鎮也羅為州始自國初且有功我太祖一三韓郡
 國次第平惟時百濟恃其險遠人馬糧穀之強且富
 不即歸命羅人明識逆順率先內附太祖之取百濟
 以羅人之力與有多焉親駕是州陞之為牧按天復
癸亥麗
祖攻錦城錦人舉城歸附仍改以長南諸州蓋所以
錦城為羅州陞牧在顯宗時
 褒之也惠王躬擐甲冑以先後左右功多子列按錦
城之
役惠王從太祖討百濟
奮勇先登功為第一大業以定丕承厥位保有民

社有創業之助有持守之功血食大廟為百世不遷

之室乃眷戀舊邦而廟享焉

按惠王祠在興龍寺州人祀之

顯王南

巡至此遂成興復之功

按顯王庚戌避州契丹師退乃還都陞為牧

賜州八關禮以此本京噫道傳二為禮部郎皆兼太

常職掌宗廟朝會之事今得罪不測落南而來遠

京國雖欲目一覩宗廟與下執事之末其可得乎然

予心則未嘗忘也今在千里外州獲聞祖功宗德之

盛登樓以望山川如古想見當時千乘萬騎頓住於

其中又覩廟貌炳然臨照得慰孤臣拳拳之懷何其

幸也嗟夫羅人田其田宅其宅安生樂業將五百年

于茲何莫非祖宗休養生息之恩亦父老所知也然
是州濱海極邊以遠所患莫倭寇若也沿海州郡或
虜或徙騷然無人不能守土地修貢賦版籍所載生
齒所息財賦所出皆棄於草木之所蕃狐兔之所穴
而其人之流散死亡皆莫之恤倭故也而羅介於其
中繁庶如平日桑麻之富禾稻被野其民晝作夜息
怡怡熙熙以樂其樂以及行旅登樓顧望山川原野
極遊覽之娛人盛物阜仰聖德而歌遺風不知行役
之勞遷逐之感也是州之在四鄰殘破蕩析之中劇
寇侵略之內而安然獨全如萬丈之陂以障橫流之

衝雖有奔蕩激射極其怒勢而其爲陂自若民恃無
恐豈非祖宗之德入人者深非若他州之民無恒產
無恒心此也豈非牧守得人能宣德意以結民心使
不散也抑父老之教有素而民知向義也吁可嘉矣
然近來倭寇尤橫其勢日進不衰父老母徂已往之
無事勵子弟修器械謹烽火以保州若縣不爲國家
南顧之憂道傳雖負罪深重自今至未死之日而得
優遊暇食羅人之賜不旣多乎

上遼東諸位大人書

奉使雜題
甲子

欽惟 聖天子乘運而起受天明命芟羣雄削僭僞

驅逐異類出之塞外革羶裘為衣冠化刑殺為禮樂
以紹中國皇王之統其功比之神禹治洪水周公攘
夷狄不足侔也而其先後奔走之臣疏附禦侮之士
賢以德能以才智者騁謀勇者效力相與贊成洪業
有若延安侯靖寧侯都督馬公指揮葉公梅公靖寧侯俱遼東都督馬公尤所謂卓然者也今者分未詳葉公名旺梅公名義
天子東顧之憂秉旄杖鉞專制方面惠以綏之威以
畏之遠人慕義而自至夷虜逃遁而喙息其功在社
稷澤被生民雖古名將相蕭曹管葛未必過之也我
小邦僻居東海之隅世講事大之禮朝聘往來史不

絕書及原失其政 皇明代德我先王審知天命人
心之所在率先諸國奉表歸附萬世子孫願爲臣妾
天子嘉之賜金印一顆封王爲東藩臣詔諭至切賚
與稠疊恩至渥也今門下鄭評理驥奉表賀天壽聖
節奉翊李常侍驥奉箋賀千秋節而道傳爲書狀官
乃以九月十八日 天子坐奉天殿受羣臣朝闔闔
天開仗儀雲簇樂奏於兩階之間一箇書生得與百
辟卿士周旋廣庭躬覩穆穆之光俯伏拜興呼萬歲
者三何其幸也是則 聖天子再造之恩亦二三大
臣贊道之賜也不勝大慶拜手稽首獻詩

於皇上天篤生聖人秉籙握樞以主神民溥海內外
是妾是臣亦監有明昭格無違賚我良弼保之佑
之百辟濟濟邦家之基延安靖寧馬葉梅公承天
子命釐此大東昭惠布威克成武功惟我小邦僻居
東偏向風慕義奉表及箋朝聘貢獻時罔或愆邦君
之職上達下宣天子之聖邦君之賢小子獻詩敢
用斐然

上都堂書

辛未

宰相之職百責所萃也故石介甫曰上則調和陰陽
下則撫安黎庶爵賞刑罰之所由關政化教令之所

自出愚以爲宰相之任莫重於此四者而尤莫重於
賞刑也所謂調和陰陽者非謂無其事而陰陽自調
自和也賞而當其功則爲善者勸刑而當其罪則爲
惡者懲矣竊謂刑之大者莫甚於篡逆其沮王氏而
立子昌迎辛禍而絕王氏者篡逆之尤亂賊之魁也
苟免天誅今已數年矣又飾其容色盛其徒從出入
中外略無忌憚而其子弟甥姪布列要職莫敢誰何
則今居宰相之任守賞刑之柄者無所辭其責矣宜
當具論罪狀啓于殿下與國人告于大廟數其罪而
討之然後在天之靈慰矣臣民之憤雪矣天地之經

立矣宰相之責塞矣若曰人之罪惡非我所知也生
殺廢置之權人主所司也宰相何與焉則董狐豈以
趙盾不討弑君之賊加惡名乎春秋之時晉趙穿弑
君直史董狐書曰趙盾弑其君盾曰弑君者非我也
史曰子爲正卿亡不越境返不討賊弑君者非子而
何孔子曰董狐良史也趙盾良大夫也爲法受惡夫
盾以正卿不討弑君之賊受弑逆之名而不辯然後
討賊之義嚴而亂賊之黨無所容於天地之間矣故
曰爲人君父而不通於春秋之義必蒙首惡之名爲
人臣子而不通於春秋之義必陷於篡弑之罪此之

謂也愚雖不才得從宰相之後與聞國政敢不以良
史之議自懼乎若曰所謂罪人有儒宗焉有連婚王
室者焉其法有難議者也則昔林衍廢元王立母弟
浼衍先定其謀而後告侍中李藏用藏用不知所爲
但曰唯唯而已後元王反正以藏用位居上相不能
寢其謀禁其亂廢爲庶人今李穡之爲儒宗孰與藏
用其首倡邪謀沮王氏而立子昌者孰與藏用但唯
林衍之謀而已胡氏曰昔文姜與弑魯桓哀姜與弑
二君聖人例以孫書若其去而不返以深絕之所以
著恩輕而義重也夫弑桓者襄公也弑二君者慶父

也文姜哀姜疑若無罪焉聖人以二夫人與聞乎故
湮絕而痛誅之如此夫嗣君夫人所出也不以子母
之私恩廢君臣之大義況其下者乎或曰稽之言曰
禍雖眈子玄陵稱爲己子封江寧大君又受天子
誥命其爲君成矣又旣已爲臣矣而逐之大不可也
此其說不亦是乎則曰主位太祖之位也社稷太祖
之社稷也玄陵固不得而私之也昔燕子噲與燕子
之或曰燕可伐歟孟子曰不可子噲不得與人燕子
之不得受燕於子噲聖賢之心以爲土地人民受之
先君者也時君不得私與人也又周惠王以愛易世

子齊桓公率諸侯會王世子于首止以定其位當是時嫡庶之分雖殊其爲惠王之子一也且以天王之尊不得私與其愛子以諸侯之卑率諸侯之衆上抗天子之命聖人義之未聞世子拒父命桓公抗君命誠以天下之義大也玄陵豈以太祖之位之民而私與逆眈之子乎又天子誥命一時權臣以爲玄陵之子欺而得之也後天子有命曰高麗君位絕嗣雖假王氏以異姓爲之亦非三韓世守之良謀又曰果有賢智陪臣定君臣之位則前命之誤天子亦知而申之矣安敢以誥命藉口乎其爲臣之說抑有

辨焉綱目前書審食其爲帝太傅周勃陳平爲丞相
後書漢大臣等誅子弘迎代王恒卽皇帝位其書曰
帝曰丞相者非爲臣之辭乎曰大臣曰誅子弘者非
討賊之辭乎不獨此耳武才人稱帝已久狄仁傑薦
張柬之爲宰相柬之廢武才人迎立中宗其薦爲宰
相者豈非爲臣也廢武才人者亦討其爲賊也百世
之下稱周陳安劉張柬之復唐之功未聞罪數公爲
臣而廢舊主也稽與玄寶雖仁義未足皆讀書通古
之士豈不聞此說乎其執迷不悟倡爲邪說以惑衆
聽於此可見先王之法造言惑衆者在所當誅况敢

倡邪說以濟亂賊之罪者乎或曰其謀迎辛禍者正
子昌在位之時雖無辛禍之迎王氏安得復興乎其
曰迎辛禍而絕王氏以罪加之之辭也當是時忠臣
義士奉 天子之命議黜異姓以復王氏僞辛之黨
先得禮部咨知 天子之有命忠臣之有議謂子昌
幼弱謀立其父以濟其私此非謀迎辛禍而絕王氏
乎或曰稽與玄寶於行為前輩有斯文之雅故舊之
情子力攻之如此無乃薄乎昔蘇軾於朱文公為前
輩文公以軾敢為異論滅禮樂壞名教深訶力詆無
少假借乃曰非敢攻訶古人成湯曰予畏上帝不敢

不正予亦畏上帝故不敢不論夫軾之罪止於立異
論滅禮法耳以朱子之仁恕攻之至以成湯誅桀之
辭並稱之況黨異姓而沮王氏者祖宗之罪人而名
教之賊魁也豈以前輩之故而貸之也况彼之言曰
戊辰年廢立之時斯文有異議所謂異議者議立王
氏也又倡言於衆曰諸將議立王氏吾父沮之吾父
之功大矣此言流聞於禍昌之耳者深矣使禍昌得
志斯文與諸將果得保其首領乎其自處之薄為何
如也自以立王氏為異議沮王氏為已功今以立偽
辛

辛

按舊本辛下有禍字而從本傳刪正

為異議沮王氏為重罪不亦可

乎或曰子已上箋辭免獻書殿下論執罪人又告廟
堂無乃已甚乎必若是言昔齊陳恒弑其君孔子沐
浴而朝曰陳恒弑其君請討之又告三子曰陳恒弑
其君請討之弑君者在齊疑若無與於魯也孔子時
已告老疑若無與於魯之政也既已請於君疑若不
必告於三子也且以聖人宏大謙容入而請於君出
而告於三子必欲討其罪人而後已誠以弑逆之賊
人人之所得誅而天下之惡一也且在魯而不忍在
齊之賊况在一國而忍一國之賊乎從大夫之後而
不忍隣國之政况在功臣之列而忍王室之賊乎春

秋書衛人殺州吁胡氏曰人衆辭其殺州吁石碯謀之使右宰醜泣也變文稱人是人皆有討賊之心亦人人之所得誅也故曰衆辭也且亂臣賊子人人所得誅也而宰相不行誅討之舉可乎況石碯以州吁之故并殺其子厚君子曰石碯純臣也大義滅親以此言之亂賊之人不論親疎貴賤皆在誅絕也或曰陳恒州吁身行弑逆者也稽與玄寶未嘗弑也此而同之不亦過乎又安知誣其罪而誤蒙也則不有胡氏之說乎弑君立君宗廟猶未亾也移其宗廟改其國姓是滅之也豈不重於弑也今黨異姓而廢王氏

之宗社者實胡氏所謂移其宗廟而滅同姓也其罪亦不止於弑也又古之大臣人有告其罪者囚服請罪如漢霍光以武帝顧命大臣擁立昭帝功德至大人有上書告其罪者不敢入禁中而待罪於外以此觀之苟有告罪者則當涕泣切請躬對有司辨明其罪然後其心安焉豈有誘妻子上書假托疾病就醫於外不與明辨乎是則自知有罪辭屈難辨必矣春秋討賊之法雖其蹤跡未著尚探其意而誅之況蹤跡已著如此者乎昔高宗封武才人爲后褚遂良許敬宗同爲宰相遂良力言不可卒至戮死敬宗順高

宗之旨曰此陛下之家事耳非宰相所得知也高宗
用敬宗之言卒立武后敬宗終享富貴五王同議反
正同受戮死無一異焉自今觀之敬宗之計得而遂
良與五王爲失矣然敬宗一時之富貴歟爾若飄風
過耳泯然無跡遂良五王之英聲義烈輝映簡策貫
宇宙而同存愚雖鄙拙恥敬宗而慕遂良傳曰始與
之同謀終與之同死旣不以愚拙棄之得叅反正之
議安敢畏姦黨之禍默然無言以苟免乎伏望法春
秋討賊之法以孔子石碣之心爲心則宗社幸甚

啓

到南陽上密直司啓

乙丑

道傳啓蒙恩授前件差遣已於今月十七日赴任上
訖獨把一麾出宰百里徒費廩養無補承宣顧惟小
鄉濱於大海島寇無時而竊發居民屢至於騷然苟
非通敏之才難得撫禦之道如道傳者學無適用知
不達人合問舍而歸田乃分符而授節茲益恭遇內
相閣下龍喉出納洪業贊襄以爲人無智愚皆有可
用取長舍短並採兼收至使疎庸亦蒙甄錄道傳謹
修謝上箋隨啓投進伏望昵侍清燕從容聞達幸甚
幸甚謹啓

序

送湖長老詩序

以下五首
錦南雜題

傳曰人受天地之中以生所謂命也故有動作威儀之則以定命也然所謂威儀之則豈可以聲音笑貌爲哉亦曰得之心而動之於四體焉耳詩曰抑抑威儀維德之隅予之誦此言久矣而難其人今見湖長老其容貌端莊行止安詳而其言有度豈吾所謂其人乎哉長老佛者也其學有曰作用是性者然乎且人但會揚眉瞬目搖手舉足而已乎抑有如是之義理準則存乎其中不可得以離乎人之作用由是則

者爲是不由是則者爲非則所謂性者有辨矣予嘉
長老之威儀有則私竊以是爲問長老其思之如有
得焉歸以教我亦相直之道也

贈祖明上人詩序

無說大師病卧琺原山佳祥寺一日倭寇突入其寺
蒼皇分散或死或虜而弟子祖明負大師走僅以身
免吾聞民生於三事之如一惟其所在則致死焉此
儒者說也浮屠人出家與世棄親如遺其佗宜若無
以爲意也而徃徃於師弟子間恩義篤盡其奔難赴
急反出仁人義士上如祖明者是則此心之中義理

本具不可得一作本泯滅矣彼或離親戚去人倫往而不返者亦獨何心歟雖然人心所同然者自我發之則彼之興感固有所不能自己者矣宜乎歌之者衆也

河相國春亭詩序

按河相國名乙沚辛禍乙卯爲全羅道元帥

相國河公以節帥全羅旣至令曰爲患吾民以遺國家憂惟倭最急便習水道輕進易退故制禦者難得其要我知之矣卽馬上誓師旅引行鳴鐘鼓樹旗幟沿海上下張皇兵威賊人不測稍自引去然不敢以無事自暇常野次于外以臨衝要以備不虞時維六

月地極南邊海霧吹炎天雲爍熱上蒸下濕公慮賓
校之病于暑也一日登高以望長江注其下羣山包
其外繚以峯巒錯以洲嶼雲收霧散瞻眺攸遠炎熱
以涼蒸濕以爽灑然若執熱而濯清冷也恍然如乘
長風御灝氣以超乎寥廓也賓校晉樂勸公構亭其
地公重違衆乃役成卒之無事事者取材誅茅不終
日告成客有請亭名者公曰吾嘗自號春亭亭吾構
也其以是命之客語人曰異哉公之名亭也亭之成
適當夏月引清風於天末納爽氣於襟袖肌膚輕快
神心夷曠不知時之爲暑而地之爲炎荒也至若金

風啓候素月揚輝叫征鴻於長洲倚孤帆於極浦陰
雲不開江天無際漁簑披雪亦此亭之勝槩也若其
野芳山榮鳥哢禽嚶僅足於一時耳四時於亭其景
如此而公獨取其一有以也夫解之者曰天有四時
以成歲人有四端以統性四時之各偏其一而春無
所不在猶四端各一其德而仁無所不包也故曰春
者春之生夏者春之長秋者春之成冬者春之藏仁
者仁之愛義者仁之制禮者仁之敬智者仁之知於
時爲春於性爲仁一理也故其在天則充塞流行無
一息之間斷播之爲四時糅之爲萬物變化無窮而

生生不息此春爲天地之仁也其在人則公平樂易
無一毫私意忿疾之累其積也和順其發也英華體
之身而身安推之家而父子親以至處事應物無一
而不得其宜此仁爲一身之春也昔朱光庭謂明道
爲春風其言不可誣也春哉仁哉淵乎其爲德之至
也非知道者孰能與於斯公之所以有意也登是亭
者毋徒取遊觀之樂當求君子體仁之意尤當求天
地生物之心然後知亭之所以爲春而能樂公之樂
也客曰唯唯於是咸係詩以詠

節序相推自四時一亭佳興少人知悠然獨得天機

妙坐對江山賦好詩

賀河公生子詩序

按河公乙丑之
大人〇丙辰

全羅道原帥密直河公赴鎮之明季春其從事朴原
賓言於道傳曰公之尊大人季十八生公公今位將
相而尊大人康強無恙季七十六又生子同邑故宰
相河公正河正河正河首為歌詩以記晉有文之士皆歌之子
豈知乎予惟盛德君子有厚積於躬不食其報然後
子孫繁衍昌大賢智之士出於其家得君行道康濟
斯民能以一門之福為邦家之福也故古之稱願於
人者必言其子孫之盛詩曰孝子不匱又曰永錫祚

胤是皆厚之道也公之尊大人不慕榮名斂身退歸
教訓子孫化及鄉黨其有厚積而不食者歟公讀書
爲通儒赴舉業巍然魁多士自筮仕以至於爲將相
出入中外夷險一節不失令聞是雖本於家庭之訓
其亦天之所以報盛德者然歟天於河氏篤厚之心
拳拳不已又晚生賢子以示錫胤之無窮吾知晉之
文士不一歌也其位將相享富貴天以是施之於前
豈獨吝之於後歟

送趙生赴舉序

按趙生名璞號雨亭

恭惟國家設科取士冀得真儒以臻至理其所以求

之者甚勤而望之者甚重果能挺出特立以不負國家求望之意者誰歟往往經濟廟堂之上折衝千里之外以爲社稷生民之賴者皆不由科目而出彼號爲儒者敝冠贏服恐恐焉延縮觀望僅足以圖保其身雖在錐刀文墨之間猶不能展布况望其明目張膽毅然立於朝以爲理道之輕重哉其無恥者則飾言語逞末技僥倖奔走橫取利祿又有在乎居之時高談濶論無所不至若付之以事則茫然不知所爲者皆是今明良相遇思革此弊罷黜其尤無良至取科目之制而更張之深教中外舉其賢者罷者而生

一朝哀然而起計偕以進其意豈徒曰取富貴而止耳蓋將以行其所學也生能體國家之意無蹈前失使儒者之效白於世則道傳生爲太平之民沒爲明時之鬼雖廢死南荒無恨也生勉之哉

贈典校金副令詩序

士之生斯世其出處去就何常當大用則大行小用則小行至於不用則不行如此而已矣然非實有諸已直知內外輕重之分者不能也吾友金君義卿讀書爲儒待時而動當歲在癸巳益齋李文忠陽坡洪文正按洪文正名彥博卽公之庶主以舊德重望專宗匠之席柄擇

士之權士之蓄奇謀抱長識深藏而不售者莫不謳吟思效踊躍自奮曰此其時矣相與駢肩累足雜進權衡之下以爭輕重之試而義卿與今韓山牧隱先生談笑而起鼓行直前朋徒拱手却立環視則莫我敢當於是排多士進立前列高擢丙科何其奇也以名罷文學入校書專讎校之任未幾以忠讜鯁直聞拜左正言知制敎使盡言政事得失至於用人當否亦得論而進退之幾於大用然義卿之才之學不宜止此且其所謂大者未試也一朝以親老引而南歸朝昏定省不離于側固無意於用而亦無意於行也

今相國河公秉全羅原帥之節至則曰方隅任重軍
民務殷理法征謀安咨賢有識達者然後行事請義
卿參帷幄待以上賓義卿感國士之遇知無不言筌
無遺策三軍之號令整齊一方之賦訟平允戎有捷
功民以底寧義卿曰今茲有成主人之賢也相國曰
非我也賓客之贊也於是狀聞拜奉善大夫典校副
令寶文閣直提學以旌其庸也義卿敘其所以用之
於朝者以用之幕府而道行主人果有成功其無所
不可也如是昔在有唐盧公邁鄭公餘慶趙公宗儒
顧公少連俱以河南幕客入朝為宰相時人榮之至

今綽有休聲吾聞宰相以人事君佗日相國之還朝也論列遺材薦進賢俊則義卿之名居先矣豈可使河南幕客專美有唐哉道傳雖廢缺矣幸未死將爲義卿拭目見其大用而大行也

贈任鎮撫詩序

甲子○按任鎮撫名誠山東人即遼東護送將辛禍已未來索

被虜人及逃軍

道之在天下者未嘗一日而亾也而所謂氣者有清濁盛衰之判故世道有治亂人材有聖愚而道之託於人者亦有晦明絕續之時也宇宙以來有虞夏商周之世道斯有變臯稷契伊傅周召之人材道之所

以行也有漢唐之世道斯有蕭曹房杜之人材道之
所以僅存也其他秦晉及隋或以詐謀或以征誅南
北朝之割據五季之分裂亂之極也世道人材固未
暇論也及宋受命五星集奎世道復文明之運人材
出道德之宗斯道之明如日星之昭晰於中天奈之
何氣之清者不得不濁盛者不得不衰一朝異類入
據中國者百有餘季亦宇宙間世道之一大變也天
心有待 眞主作興奉辭伐罪正位居體以滌新天
下之耳目據華夏之憤雪百王之恥功至大也德至
盛也其坐而論思作而奔走皆命世之德王佐之才

今以遼東一路觀之與小邦境壤相接歲時行李往來由之今道傳從宰相鄭評理奉表賀天壽聖節路過遼東得謁撫兵官其客量偉器亦今世之方叔召虎也退見賓客借籌尊俎之間草檄帷幄之中以折衝千里之外固多士之選而鎮撫任先生常在軍旅不廢講學尤遽於濂洛性命之學其雅意澹泊志行純潔一代之高士也由此觀之有明之人才世道非漢唐之人才世道乃虞夏商周之人才世道也道之託於人者晦之甚而復明絕之久而復續所謂在天下未嘗亡者於此可見今者蒙犯霜露跋涉山川

遠送于鴨江之上終日並轡笑語諧適講論至切不
知道里之遠行役之勞受賜多矣臨別序言亦回路
贈與處之義也詩曰

皇明撫中夏聲教暨四夷多士如雲從翼以六龍飛
翩翩任夫子好學本天資佐此遼東幕畫策何其奇
顧我亦狂簡一見許相知不辭道里遠來送鴨江湄
天寒朔風急雪深黃草衰欸欸馬上語不知行役疲
我有一言贈珍重莫相違相與崇令名遠大以爲期
送楊廣按廉庾正郎詩序

予丁家憂因居榮州南方學者多從之遊今楊廣道

按廉副使庾公亦在焉於儕輩季最少與之語道理古今事默然心解至論政事吏理一一領略退充然若有得予固目異之謂諸生曰此子佗日必為有用之才矣後棄科舉業從事文墨朝廷以公有通敏才拜監察糾正平壤乃西北都會之所軍民務劇尹公一本無公字以重臣出公為判官佐之幕府稱其能入典法為正郎獄無冤滯又督陰竹屯田歲入倍前仍察訪一道兼軍須姦猾畏服府庫充盈若公者可謂才矣嘗論儒吏之說道德蘊之於身心斯謂之儒教化施之於政事斯謂之吏然其所蘊者即所施之本而

所施者自其所蘊者而推之儒與吏為一人道德與教化非二理也自世道之降道德變為詞章教化易為法律而儒吏於是乎判矣此斥彼為俗彼訾此為腐世之言道德教化者皆為無用之長物其間或有以儒術緣飾吏理者亦不過自濟其私而已予學且陋然從予遊者若秘判安公按楊廣大護軍李公按慶尚中書成公司農金公按交州卓有成績及今版圖庾公亦以重選按楊廣皆儒之效吏之循也語曰學而優則仕仕而優則學是仕與學相須也二子若因其才質之美勉進不已侘日成就固未易量也

且將使斯世知真儒循吏之在此而不在彼矣前待
制尹公性狷直少許可於庾公素相善且有姻故作
詩送其行曰念昔吾家正獻公觀風揚廣至原中外
孫玄壻今持節舊宅春光思不窮大司成權奉翊已
下二十八人分韻賦詩謂道傳有舊屬以序

送宋判官赴任漢陽詩序

按宋判官名
因號杏亭

嗚呼為臣忠為子孝二者人道之大端而立身之大
節也所居之位不同時與事常相違而不相值忠以
孝不得兼盡為人臣子者或有所憾焉漢陽府判官
宋侯事父母盡孝道始居全羅道寶城海寇深入作

耗宋侯奉兩親避其難間闢草莽恐不免遠徙楊廣
道果州賃田宅以居課僮僕農耕供甘旨郡縣感孝
誠多所餽遺及父卒自初喪至葬祭皆以禮哀動鄰
里喪母亦如之于時國家舉式序之典尤重守令命
下臺省各舉所知上宋侯名慈祥廉幹宜近民不謀
而同於是奪哀加階奉善大夫知旌善郡事宋侯上
書辭以違遠墳墓不得親朔望之祭請終喪語甚哀
切朝議孝子志不可奪守令亦難其人漢陽去果州
不數十里聽訟之暇往修朔望庶兩得也卽改漢陽
府判官拘制降階通直郎吏督上道不得已之官噫

三
人之於仕進一資半級在所必計宋侯以親故舍高
取卑賢夫孝則固已忠其在此行乎諸公嘉宋侯之
志咸賦詩以贈朋友之意也予鄉人也敢自幸於是
作序

若齋遺藁序

甲子後

道傳一日得亡友若齋遺藁若干卷泣且讀因濡翰
書其端曰此東國詩人金敬之所作也書未訖客詰
之曰金先生學術行義豈但詩人而止歟先生生世
族幼而聰敏既就學與固隱鄭公陶隱李公及故正
言李順卿義愛充篤朝夕講論切磋不少怠吾東方

義理之學蓋由數公倡之也國家崇重正學更張舊
制增廣生員宰相韓山李公主盟師席拔薦名儒爲
學官而先生以佗官兼直講諸生執經受業列于席
前雖告休沐從而質問者相繼于家多所進益先生
學術之正爲如何當甲寅乙卯之歲國家多故時相
用事先生上書力言得失不報竄竹州例徙居母鄉
驪興郡自號驪江漁父扁其所居堂曰六友按六友謂江山
雪花以樂江山四時之景凡七季國家尙其風義召
雪月拜諫官尋長于成均言責官守兩無所愧又以先生
有專對才行禮遼東都司適有朝命不許私交置先

生雲南行至四川之瀘州得病卒于旅次

按辛禍甲子義州千

戶曹桂龍至遼東都指揮梅義等給曰我於爾國事

每盡心行之爾國何不致謝耶禍以九容為行禮使

奉書幣往遼東義與摠兵潘敬等曰人臣無私文何

得乃爾遂執歸京師帝命流大理衛行至瀘州永

寧縣先生自始行至病卒間關萬里備嘗艱難略無

顧慮自惜之意臨絕曰吾在家死兒女手誰有知者

今在萬里外死於王事至使中國人知吾姓名可謂

得死所矣無一言及家事先生行義之高又為如何

道傳攬涕而言曰子之言誠是也敬之學術行義備

諸史牒播於人口奚待予言哉詩道之難言久矣自

雅頌廢騷人之怨誹興昭明之選行而其弊失於纖

弱至唐聲律

聲律舊本作律聲

作詩體遂大變李太白杜子

美尤所謂卓然者也宋興真儒輩出其經學道德追復三代至於聲詩唐律是襲則不可以近體而忽之也然世之言詩者或得其聲而遺其味或有其意而無其辭果能發於性情興物比類不戾詩人之旨者幾希在中國且然況在邊遠乎敬之外祖及菴閔公思平善詞學尤長於唐律與益齋愚谷諸公相唱和敬之朝夕侍側目濡耳染觀感開發而自得尤多道傳嘗見敬之之作詩其思之也漠然無所營其得之也充然若自得其下筆也翩翩然如雲行鳥逝其為詩

也清新流麗殊類其為人敬之之於詩道可謂成矣
客曰然卒書以為序

圃隱奉使臺序

丙寅

道傳十六七習聲律為對偶語一日驪江閔子復

按

復閔安

謂道傳曰吾見鄭先生達可曰詞章末藝耳

有所謂身心之學其說具大學中庸二書今與李順
卿攜二書往于三角山僧舍講究之子知之乎予既
聞之求二書以讀雖未有得頗自喜屬國家設賓興
科先生來自三角山連冠三場名聲藉藉予亟往謁
則與語如平生遂賜之教日聞所未聞後奔父喪榮

州居二年繼有母喪凡五年

按提學公行狀曰至正丙午正月提學公卒是

年十二月夫人禹氏卒此云奔父喪居二年繼有母喪凡五年兩處必有一誤

先生送孟子

一部朔望之暇日究一帋或半帋且信且疑思欲取

正於先生喪畢還松京牧隱先生以宰相領成均倡

性命之說斥浮華之習舉先生及李子安朴子虛朴

誠之

之當作夫

金敬之充學官講論經學先生於大學之

提綱中庸之會極得明道傳道之旨於論孟之精微

得操存涵養之要體驗擴充之方至於易知先天後

天相為體用於書知精一執中為帝王傳授心法詩

則本於民彝物則之訓春秋則辨其道誼功利之分

吾東方五百季臻斯理者幾何人哉諸生各執其業
人人異說隨問講析分毫不差牧隱先生喜而稱之
曰達可豪爽卓越橫說豎說無非的當道傳間往聽
之不意孤陋所得往往默契焉獲被諸公薦側於學
官之列出入與俱自是從遊之久觀感之深雖曰知
先生甚悉非僭也先生之學日以長進詩亦隨之當
其少時志氣方銳直視無前故其言肆以達更踐既
久收斂有如其為侍從也獻納論思潤色王化故其
言典以則其見逐南荒也處憂患之中安義命之分
故其言和易平淡無怨悱過甚之辭其奉使日本也

涉鯨濤之險在萬里外國正其顏色修其辭令揚于
國美使殊俗景慕故其言明白正大無局迫沮挫之
氣 皇明有天下四海同文先生三奉使至京師益
其所見益廣所造益深而所發益以高遠渡渤海登
蓬萊閣望遼野之廣邈觀海濤之洶湧興懷敘言不
能自已於是有渡海宿登州公館詩蓬萊驛示韓書
狀尚質詩道龍山邈迤逾淮河登舟沿范光湖絕大江
至龍潭皆有題詠如客夜聞鶯等詩覽時物之變感
行役之遠潼陽驛壁薦熊圖歌凜凜有生意憶宗誠
宗本子隱則極慈祥之念憶陶隱三峯遁村則篤友

愛之情望北固山悼金若齋則不以存亡易其心厚
之道也吊韓信主晦翁以明其非罪詠漂母以金易
名不爲無報過卽黑責樂毅先負惠王微顯闡幽之
義也其皇都舊本作朝誤四首入京出京二絕鋪張 聖
天子字小懷遠之仁功臣將相富貴尊安之榮與夫
城郭宮室之巨麗人物之繁華無不備載採詩者以
此陳於太史氏其爲 皇明之雅無疑矣其佗酬唱
題詠又皆高妙難可殫記道傳於洪武十八季從先
生賀天壽聖節今誦其詩卽其事想其地宛然在目
詩可以觀不其信歟噫先生之學有功於後世先生

之詩有關於世教如此寧不為吾道重也此予所以
不揆鄙拙樂為之道因以及得於先生者託不朽焉
洪武十九年六月下泮序

送華嚴宗師友雲詩序

按友雲即珠公
號封齋生君

華嚴宗師友雲乃侍中竹軒金倫金公之子而侍中

息齋

金敬直號

公其兄也幼投華嚴宗祝髮學賢首教觀

既通過鴨綠江由遼瀋北入于燕都遂南遊江浙至
吳會往返幾萬里所至尊宿許之儕輩推之拈示之
偈畱贈敘別之什盈於囊橐其聞善財之風而興起
者歟及東還與其弟曹溪岑公俱有名大為玄陵知

遇歷佳名刹既老退休于鷄林之檀菴優游於山水間者五六年國家強起之住于大公山之符仁寺實巨刹也未幾邀至松京法王寺為華嚴宗師扶樹宗風開悟後學僅一暮辭去甚切國家不得已從之韓山牧隱先生首為歌詩贈其行諸公繼而和之者多矣其門人義砧以先生之命來徵序文道傳不敏烏能言哉惟金氏本三韓大族以詩書禮樂為家庭之訓公之所養有素矣夫華嚴融法相為一體達理事無二致公之學大矣遊歷諸方廣覽山川多閱人物公之得於觀感者深矣挾是三者焉往而不自得而

公委然其順頽然其歸泊然而無所求於世其行高
矣安乎公退而人進之公去而人思之此諸公所以
歌詩之意也而道傳亦敢以是爲序焉

陶隱文集序

戊辰十月

日月星辰天之文也山川草木地之文也詩書禮樂
人之文也然天以氣地以形而人則以道故曰文者
載道之器言人文也得其道詩書禮樂之教明於天
下順三光之行理萬物之宜文之盛至此極矣士生
天地間鍾其秀氣發爲文章或揚于天子之庭或仕
于諸侯之國如尹吉甫在周賦穆如之雅史克在魯

亦能陳無邪之頌至於春秋列國大夫朝聘往來能
賦稱詩感物喻志若晉之叔向鄭之子產亦可尚已
及漢盛時董仲舒賈誼之徒出對策獻書明天人之
蘊論治安之要而枚乘相如遊於諸侯咸能振英摘
藻吟詠性情以懿文德吾東方雖在海外世慕華風
文學之儒前後相望在高句麗曰乙支文德在新羅
曰崔致遠入本朝曰金侍中富軾李學士奎報其尤
者也近世大儒有若雞林益齋李公始以古文之學
倡焉韓山稼亭李公京山樵隱李公從而和之今牧
隱李先生早承家庭之訓北學中原得師友淵源之

正窮性命道德之說既東還延引諸生見而興起者
烏川鄭公達可京山李公子安潘陽朴公尙東密陽
朴公子虛永嘉金公敬之權公可遠茂松尹公紹宗
雖以予之不肖亦獲側於數君子之列子安氏精淡
明快度越諸子其聞先生之說默識心通不煩再請
至其所獨得超出人意表博極羣書一覽輒記所著
述詩文若干篇本於詩之興比書之典謨其和順之
積英華之發又皆自禮樂中來非淡於道者能之乎
皇明受命帝有天下修德偃武文軌畢同其制禮作
樂化成人文以經緯天地此其時也王國事大之文

大抵出子安氏 天子嘉之曰表辭誠切今茲修歲

時之事渡遼瀋經一本齊魯涉黃河之奔放入天

子之朝其所得於觀感者為如何哉嗚呼季札適魯

觀周樂尚能知其德之盛子安氏此行適當制作之

盛際將有以發其所觀感者記功述德為明雅頌

以追于尹吉甫無愧矣子安氏歸也持以示予則當

題曰觀光集云

送靖安君赴京師詩序甲戌

恭惟 殿下畏天事大克謹侯度罔或有違 天子

嘉之命親男以朝而 靖安君寔行乃以六月乙亥

殿下率羣臣拜表于壽昌宮儀仗分左右樂部導前
送至于宣義門外都人父老填溢街巷瞻望咨嗟皆
曰吾君一遣子而萬民賴以安盍歌之俾後子孫
無忘也相與歌曰天子之明兮吾君之誠兮之
子之行兮爲斯民開太平兮門下侍郎成石璘繼其
歌而賦之侍中平壤伯已下諸大夫皆和焉分韻成
詩凡二十八篇以序文屬道傳辭不敏不獲曰靖
安君天性聰敏學問夙成今茲內承君父之命上
覲天子之朝立玉墀方寸地以近穆穆之光敷奏
詳明獲奉吾君錫命而還在家爲孝子在國爲忠

臣是則靖安君之所自期而諸大夫亦以是望之也若其時當炎暑雨滂相仍跋涉山川行役間關皆有感於中者而靖安君不以是介乎懷吁賢矣哉

三峯集卷之四目錄

記

石亭記

消災洞記

高麗國新作都評議使司廳記

求仁樓記

君子亭記

二樂亭記

景福宮

康寧殿

延生殿

慶成殿

思政殿

勤政殿

勤政門

隆文樓

隆武樓

正門

青石洞宴飲記

說

李浩然名字後說

無說山人克復樓記後說

景濂亭銘後說

答田父

錦南野人

家難

題跋

李牧隱送子虛詩序卷後題

讀東亭陶詩後序

題蘭坡四詠軸末

題漁村記後

蘭坡四詠後說跋

題眞贊後

傳

鄭沉傳

行狀

高麗國檢校密直提學刑部尚書鄭先生行狀

墓表

廉義之墓

祭文

哭潘南先生文

謝魑魅文

祭文僖公文

策題

會試策

殿試策

銘

竹窻銘

河浩甫字銘

贊

趙政丞凌真贊二首

三才圖會

三

三峯集卷之四

奉化 鄭道傳 著

記

石亭記

以下二首
錦南雜題

申公昌父介特人也其守有確然不可奪者嘗位於朝既顯矣終以剛直不屈見忤權臣卽引退歸田里性愛石出外遇石稍異者輒致之家大者車載之其次馬馱之又其次使僕負之或腋之凡力可以致者無遺焉方者銳者博者狹者棄擲邐迤縱橫交錯有端重確實清秀瓌偉如君子之德容者奇奇恠恠如

山林煙霞之士者諤諤翼翼如忠臣正色立朝論難利害者其他嶮岬突怒如虎豹之拏者跣跟騰倒如羣羊戲觸者瑣瑣屑屑交首接尾如魚兒成隊者若此之類難可殫記公合而名其亭曰石亭曰磅礴於其中夏風扇清秋月澄耀花草增妍霜雪愈寒皆石之助也然人徒知公之樂乎石而不知石之所以爲樂也易曰介于石不終日貞吉公之守有確然不可奪者不屈權勢其介于石歟卽引退歸田里其不終日歟以道自樂無意外不測之禍其貞吉歟或者公之樂其出於此乎是可記已

消災洞記

道傳僊居消災洞黃延家洞卽羅屬部曲居平之地
有寺曰消災故以爲名環洞皆山也而其北東則重
巒疊嶺形勢相屬西南諸峯低小可以眺望又其南
原野平行樹林煙火茅茨十餘戶乃會津縣也其名
山水曰錦城山端重竒偉以據乎東北羅之鎮也曰
月出山清秀突兀以阻乎東南靈巖郡界也曰錦江
由羅東南流過會津縣南西入海洞距海數十里其
山嵐海瘴之氣中人肌膚病作無時然朝夕晦明氣
象萬千亦可翫也洞中無異草木唯黃茅脩竹間於

松楠人家門戶藩籬往往以竹代木其蕭灑清寒之
狀使遠人亦樂而安之也居人淳朴無外慕力田為
業延其尤也家善釀延又喜飲每酒熟必先觴予客
至未嘗不置酒日久益恭有金成吉者頗識字其弟
天能談笑亦皆善飲兄弟同居有徐安吉者老為僧
曰安心高鼻長面容儀詭恠凡方言俚話鄉井閭巷
之事無不記有金千富者曹松者其飲亦成吉之
流也日從予遊每得時土物必持酒漿而來盡歡乃
去予寒一裘暑一葛早寢晏起興居無拘飲食惟意
與二三學者講論之餘黃緣溪磴登降巖谷倦則休

樂則行其遇佳處徘徊瞻眺嘯咏忘歸或逢田父野
老班荆而坐相勞問如故一日登後岡以望愛其西
偏稍平夷下臨廣野遂命僕剔去樵翳構屋二間不
翦茅不削木築土爲階編荻爲籬事簡而功約而本
無而洞人皆來助之不數日告成扁曰草舍因居之
噫杜子美在成都構草堂以居僅閱歲而已而草堂
之名傳千載予之居草舍幾時予去之後草舍爲風
雨所漂壞而已耶野火所延藝朽爲土壤而已耶抑
有間於後歟無歟皆未之知也但予以狂疎戇直見
棄於時放謫在遠洞人遇我甚厚如此豈哀其窮而

三
收之歟抑長生遠地不聞時議不知予之有罪歟要
皆厚之至也予且愧且感因記其本末以致意焉

高麗國新作都評議使司廳記

已巳

洪武二十二年十二月丙午殿下命臣道傳曰都評
議使實予相臣左右我寡躬者也當政之始而使司
廳適成爾宜記其顛末明示後世臣道傳拜手稽首
而言曰國家置門下府掌理典三司掌錢穀密直掌
軍旅各司其職有大事則會三府以議之謂之都評
議使司因事置罷蓋周禮官聯之遺意也近來使司
專總衆職常置不罷其職任禮秩固已重於百僚矣

而無定署至是新作署宇門下贊成事臣禹仁烈評
理臣僕長壽臣金南得政堂文學臣金湊同知密直
司事臣柳和簽書密直司事臣李恬慈惠府尹臣俞
光祐實董其役焉凡削材埽瓦皆役雇直之徒而督
勤工繕經營於旬月之間民不知勞其巍然而據于
中者曰使司廳翼然而拱于左右者曰首領官廳首
領官卽古卿士之職也承以廊廡繚以垣墻以至厨
庖府藏無不周完矣殿下始以門下侍中臣沈德符
守門下侍中臣李國諱爲判事三司則判事臣王
安德以下門下則贊成事臣鄭夢周以下爲同判事

密直則判事臣金

舊本
作金

士安以下爲使正其名稱使

司之任益重矣唐以他官帶同平章事者得爲宰相
卽其制也臣道傳亦濫以庸疎同判使司而命臣以
記文臣不敏何足以言哉語曰能近取譬臣請卽此
廳而言之堂宇譬則君也樑棟譬則相也基譬則民
也基當基當舊本
作堂基堅厚樑棟當安峙然後堂宇得以
固緻矣樑棟上以承其宇下以藉其基猶宰相奉君
父而撫民庶也書曰臣爲上爲德爲下爲民此之謂
也入此廳者視其宇思所以奉吾君視其基思所以
厚吾民視其樑棟思所以稱吾職可也古之善相天

子者有若咎癸房杜其在列國有若叔向公孫僑皆
名相也雖有天子列國之殊所以順天時遂民生奉
君上理庶官則其職一也咎癸不可尚已房以謀杜
以斷叔向以直公孫僑以惠蓋非謀事不集非斷事
不成非直民不服非惠民不懷若數子者亦善其職
矣然猶有所未盡也必若先儒真西山之論相葉曰
格君曰正已曰知人曰處事然後可也夫格君者亦
自正而已身既正矣須有知人之明處事之方乃可
濟也幸今國祚中興明良相遇上以誠待下下以誠
事上此東方一盛際也為相臣者宜各自勉以副登

庸之意則使司之設其庶幾矣於是乎記

求仁樓記

世之極遊觀之樂者必窮山水之幽深涉原野之曠
漠疲精神勞筋骨然後得之亦不過快目前之景恣
一時之玩而已樂極而罷俯仰之間惘然成陳跡猶
如昨夢之無有其或得之畿甸之間如裴晉公之綠
野堂謝太傅之別墅誠亦難矣或在晚年懸車之後
或在國步危急之秋後之好事者不能不爲之浩歎
也惟吾尹公逢國家閒暇之時以妙年入中樞叅機
密卜地得城東南隅構草屋以居有山蒼然色乎其

外有泉冷然出乎其中又起新樓于屋之東曰邀賓
客觴詠樓上蓋不離將相之位而翛然有幽人出塵
之想不出戶庭之間而悠然得山水遊觀之樂所謂
仁遠乎哉我欲仁斯仁至矣者寧不信歟孔子又曰
仁者樂山請以求仁名是樓若夫仁道之大與其求
之之方當在自勉焉他日對子必刮目矣

君子亭記

吾黨有達官者其風儀挺然而秀發志操卓爾而不
羣君子人也一日開新亭于松樹之下邀諸公而觴
之請予亭名予指松而語之曰彼其蒼然其髯偃然

其形則君子之德容也。窮冬沍寒，風號雪虐，衆卉摧折而亭亭，後凋盛。夏炎熱，石鑠金流，生物憔悴而鬱鬱不變，是則君子固守其節，不爲貧賤之所能移。威武之所能屈也。請名是亭曰：君子可乎？大抵古人之於草木，愛之各以其性之所近。靈均慷慨之士，故取蘭之香潔；靖節恬退之士，故取菊之隱逸；以是觀公之所愛，則其中之所存，益可知矣。抑登是亭者，果有磊磊落落，不苟合於時世者乎？確然自持，不受變於流俗者乎？則此亭之樂，豈公之所獨有，當與諸公共之矣。諸公曰：諾。於是乎書。

二樂亭記 乙亥

殿下定都之明年分命親臣往治州郡蓋以軍民爲重也宗盟門下左政丞平壤伯門下右政丞上洛伯與諸同盟餞之于新都之南登所謂二樂亭行者念及王事之靡盬其經營四方之志爲如何居者勉之以使命之重其丁寧相贈之意又如何而眷戀惜別之情江山臨眺之興交相感矣則其叙言也有不能自己者於是屬予爲文記之予曰二樂亭乃義安伯別墅也有峯屹然立于漢江之中構亭其上以爲遊觀之所諸山端重如仁者以靜自守江水通注如智

者動而不括宜君子之所當樂也至若雲煙掩曖於
原野之外鷗鳥上下於沙洲之際樹木陰翳清風自
至景物之美至矣伯以王室介弟寄興山水間亦賢
矣哉雖然諸公當草創之時庶事未遑憂勞盡瘁且
不暇於樂矣昔范文正公登岳陽樓歎曰先天下之
憂而憂後天下之樂而樂我思古人實獲我心予亦
以爲待諸公戮力王室底定生民功成謝事然後尊
俎杖屨翱翔於此亭之上恣心志之娛樂極江山之
形勝更爲諸公賦之

景福宮

臣按宮闕人君所以聽政之地四方之所瞻視臣民之所咸造故壯其制度示之尊嚴義其名稱使之觀感漢唐以來宮殿之飾或沿或革然其所以示尊嚴而興觀感則其義一也 殿下卽位之三年定都于漢陽先建 宗廟次營宮室越明年十月乙未親服袞冕享 先王先后于新廟宴羣臣于新宮蓋廣神惠而綏後祿也酒三行命臣道傳曰今定都享 廟而新宮告成嘉與羣臣宴享于此汝宜早建宮殿之名與國匹休於無疆臣受命謹拜手稽首誦周雅既醉以酒既飽以德君子萬年介爾景福請名新宮曰

景福庶見 殿下及與子孫享萬年太平之業而四方臣民亦永有所觀感焉然春秋重民力謹土功豈可使為人君者徒勤民以自奉哉燕居廣廈則思所以庇寒士涼生涼生舊本殿閣一作閣則思所以分清陰然後庶無負於萬民之奉矣故併及之

康寧殿

臣按洪範九五福三曰康寧蓋人君正心修德以建皇極則能享五福康寧乃五福之一舉其中以該其餘也然所謂正心修德在衆人共見之處亦有勉強而爲之者在燕安獨處之時則易失於安佚而儆戒

之志每至於怠矣而心有所未正德有所未修皇極
不建而五福虧矣昔者衛武公自戒之詩曰視爾友
君子輯柔爾顏不遐有愆相在爾室尚不愧于屋漏
武公之戒謹如此故享年過九十其建皇極而享五
福明驗已然蓋其用功當自燕安幽獨之處始也願
殿下法武公之詩戒安佚而存敬畏以享皇極之福
聖子神孫繼繼承承傳于千萬世矣於是稱燕寢曰
康寧

延生殿 慶成殿

天地之於萬物生之以春成之以秋聖人之於萬民

生之以仁制之以義故聖人代天理物其政令施為一本乎天地之運也東小寢曰延生西小寢曰慶成以見 殿下法天地之生成以明其政令也

思政殿

天下之理思則得之不思則失之蓋人君以一身據崇高之位萬人之衆有智愚賢不肖之混萬事之繁有是非利害之雜為人君者苟不深思而細察之則何以別事之當否而區處之人之賢否而進退之自古人君孰不欲尊榮而惡危殆哉親近匪人為謀不臧以至禍敗者良由不思耳詩曰豈不爾思室是遠

而一作爾孔子曰未之思也夫何遠之有書曰思曰睿

睿作聖思之於人其用至矣而是殿也每朝視事於

此萬幾存臻

存臻一本作輻輳

皆稟

殿下降勅指揮尤不

可不之思也臣請名之曰思政殿

勤政殿

勤政門

天下之事勤則治不勤則廢必然之理也小事尚然況政事之大者乎書曰儆戒無虞罔失法度又曰無教逸欲有邦兢兢業業一日二日萬幾無曠庶官天工人其代之舜禹之所以勤也又曰自朝至于日中昃不遑暇食用咸和萬民文王之所以勤也人君之

不可不勤也如此然安養既久則驕逸易生又有諂
諛之人從而道之曰不可以天下國家之故疲吾精
而損吾壽也又曰既居崇高之位何獨懷自卑屈而
勞苦為哉於是或以女樂或以遊畋或以玩好或以
土木凡所一本所下有以字荒淫之事無不道之人君以為
是乃愛我一本無我字厚不自知其入於怠荒漢唐之君
所以不三代若者此也然則人君其可一日而不勤
乎然徒知人君之勤而不知所以為勤則其勤也流
於煩碎苛察不足觀矣先儒曰朝以聽政晝以訪問
夕以修令夜以安身此人君之勤也又曰勤於求賢

逸於任賢臣請以是爲獻

隆文樓 隆武樓

文以致治武以戡亂二者如人之有臂不可偏廢也
蓋禮樂文物燦然可觀戎兵武備整然畢具至於用
人文章道德之士果敢勇力之夫布列中外是皆隆
文隆武之至庶見 殿下文武並用以臻長久之治
焉

正門

天子諸侯其勢雖殊然其南面出治則皆本乎正蓋
其理一也若稽古典天子之門曰端門端者正也今

稱午門曰正門命令政教必由是門而出審之既允而後出則讒說不得行而矯偽無所托矣敷奏復逆必由是門而入審之既允而後入則邪僻無自進而功緒有所稽矣闔之以絕異言竒邪之民開之以來四方之賢此皆正之大者也

青石洞宴飲記

六月甲申天使黃公等還京師侍中平壤伯侍中上洛伯與諸公送至于金郊驛日中而返時當炎暑火雲甚熾堂吏張幕于青石洞溪邊爲避暑也諸公據胡床坐水流其下風自四至身夷神曠脫然若沉疴

去體高管噉

舊本作激

噪流觴再匝諸公相與熙然而樂

未幾平壤伯遽曰樂則樂矣無已過乎道傳曰宰相

之職勞矣衆責萃其身百慮縈

一本作營

其心以致氣鬱

志滯雖明且智未免或有所遺失也故禪謀謀鄭國

之政必至於野益於閒靜之中而得之也然則宣其

堙鬱之氣道其滯塞之志其必有助之者乎諸公曰

子之言是也然平壤伯偶因送客至此一見諸公之

樂遽戒其過是又不可不識也於是乎書

說

李浩然名字後說

按李原齡避辛毗之禍竊負其父唐畫伏夜行隱于永川

睦誅始還改名與字
李崇仁作名字說

客問曰李君原齡更名集字浩然何也李君差嘗困
於憂患豈微其平日而有所改歟予曰否不然也李
君義士也凡事苟自外至者舉不能動其中況改平
日哉李君憂患我知之當逆睦用事時君之鄉人有
為睦門下舊本脫下字者君不義其所為大忤其意將害
之君避之南方携老扶幼野處草食風霜雨雪之所
侵盜賊虎狼蟲蛇之患飢寒凍餓憂勞窮厄凡所謂
人所苦者方叢于一身而君之志不小衰是其中必
有所養者存故於憂患之來其安之以義也若泰山

之重人不見其動轉其去之以勇也若鴻毛之於燎
原之火泯然無跡其愈困而愈堅其志也如精金良
玉雖有烘爐之鑠沙石之攻而其精剛溫潤之質愈
益見也非中有所養者能然乎由是言之李君之要
名字蓋將識其養之素而守之固以加勉之也謂是
爲困於憂患徵其平日而改之云者非知李君者也
客曰聞命矣其所養者與養之之方何如今李君集
其名字浩然是本於孟子之言也近星山李氏爲李
君名字序甚詳且明奚容贅焉然不可孤問意強一
言之夫所謂浩然者乃天地之正氣也凡物之盈於

兩間者皆得是氣以爲之體故在鬼神爲幽顯在日月星辰爲照臨軋之爲雷霆潤之爲雨露爲山岳河海之流峙爲鳥獸草木之所以蕃其爲體也至大而至剛包宇宙而無外入毫芒而無內其行也無息其用也無所不周而人則又得其最精者以生故其在人耳目之聰明口鼻之呼吸手之執足之奔皆是氣之所爲本自浩然無所欠缺與天地相流通此則李君之所養者而其養之也又非私意苟且而爲也舍之不可也助之不可也必有事焉集義而已矣噫是氣流行之盛雖金石不可遏入水而水不濡入火而

火不熱觸之者碎當之者震裂而莫能禦况吾既得
最精者以生而又養其最精者於吾身之中以為之
主則向所謂人所苦者皆外物之生於是氣之餘者
又安能反害於吾之最精者哉此吾斷然以為李君
中有所養而無所改於憂患而無疑者也客唯唯而
退書以贈李君為名字後序

一本說

無說山人克復樓記後說

以下五首
錦南雜題

餘鯢

按餘鯢羅廢屬縣

趙生璞袖克復樓記來示予曰此記

乃無說山人所作樓在湧琮寺夫人之所貴乎樓觀
者以其登高望遠遊心騁目窮山川引風月以資遊

觀之樂而已於學也無與焉今茲樓以克復名何取
於樓哉予曰否不然也人之憂樂係之心而發之於
所遇之境彼其心有係於憂者雖遇山川之勝風月
之美適足以爲之傷感也零陵之山南方之最秀者
也而逐臣一作本以爲囚岳陽之樓天下之壯觀也而
遷客以爲悲苟失其本心則無往而不感感也雖有
樓觀豈得而樂哉若夫克去己私以復天理則其心
豁然與天地同其大萬物同其和浩浩蕩蕩隨所遇
而皆樂故有以簞瓢陋巷而不改其樂者顏子之克
復也要之惟其仁而後能樂其樂也其以克復名樓

得其本哉

景濂亭銘後說

謙夫卓先生說於光州別墅鑿池種蓮築土池中爲小島構亭其上日登以樂益齋李文忠公命其亭曰景濂蓋取濂溪愛蓮之義欲其景慕之也夫見其物則思其人思其人則必於其物致意焉感之深而厚之至也嘗謂古人之於花草各有所愛屈平之蘭陶潛之菊濂溪之於蓮是也各以其中之所存而寓之於物其意微矣然蘭有馨香之德菊有隱逸之高則二子之意可見且濂溪之言曰蓮花之君子也又曰

蓮之愛同予者何人夫以其所樂與人共之聖賢之
用心也而嘆時人之莫已知以俟後來於無窮苟知
蓮之爲君子則濂溪之樂庶乎得矣然因物而得聖
賢之樂亦豈易言哉黃魯直曰周茂叔宵中灑落如
光風霽月程子曰自見周茂叔每令尋仲尼顏子樂
處所樂何事自是吟風咏月以歸有吾與點也之意
道傳私竊以爲景濂有道須要識得灑落氣象有與
點之意然後可以言至文忠公之銘曰鈎簾危坐風
月無邊一句截斷古人公案安得一登其亭與謙夫
同參

答田父

寓舍卑側隘陋心志鬱陶一日出遊於野見一田父
鴈眉皓首泥塗露背手鋤而耘予立其側曰父勞矣
田父久而後視之置鋤田中行原以上兩手據膝而
坐願予而進之予以其老也趨進拱立田父問曰子
何如人也子之服雖敝長裾博袖行止徐徐其儒者
歟手足不胼胝豐頰皤腹其朝士歟何故至於斯吾
老人生於此老於此荒絕之野窮僻瘴癘之鄉魑魅
之與處魚鰕之與居朝士非得罪放逐者不至子其
負罪者歟曰然曰何罪也豈以口腹之奉妻子之養

車馬宮室之故不顧不義貪欲無厭以得罪歟抑銳
意仕進無由自致近權附勢奔走於車塵馬足之間
仰哺於殘盃冷炙之餘簪肩諂笑苟容取悅一資或
得衆皆含怒一朝勢去竟以此得罪歟曰否然則豈
端言正色外示謙一本作退盜竊虛名昏夜奔走作飛
鳥依人之態乞哀求憐曲邊橫結釣取祿位或有官
守或居言責徒食其祿不思其職視國家之安危生
民之休戚時政之得失風俗之美惡漠然不以爲意
如秦人視越人之肥瘠以全軀保妻子之計偷延歲
月如見忠義之士不顧身慮以赴公家之急守職敢

言直道取禍則內忌其名外幸其敗誹謗侮笑自以
爲得計然公論誼騰天道顯明詐窮罪覺以至此乎
曰否然則豈爲將爲帥廣樹黨與前驅後擁在平居
無事之時大言恐喝希望寵錫官祿爵賞惟意所欲
志滿氣盛輕侮朝士及至見敵虎皮雖蔚羊質易慄
不待交兵望風先走棄生靈於鋒刃誤國家之大事
否則豈爲卿爲相狠愎自用不恤人言佞已者悅之
附已者進之直士抗言則怒正士守道則排竊君上
之爵祿爲已私惠弄國家之刑典爲已私用惡稔而
禍至坐此得罪歟曰否然則吾子之罪我知之矣不

量其力之不足而好大言不知其時之不可而好直
言生乎今而慕乎古處乎下而拂乎上此豈得罪之
由歟昔賈誼好大屈原好直韓愈好古關龍逢好拂
上此四子皆有道之士或貶或死不能自保今子以
一身犯數忌僅得竄逐以全首領吾雖野人可知國
家之典寬也子自今其戒之庶乎免矣予聞其言知
其為有道之士請曰父隱君子也願館而受業焉父
曰予世農也耕田輸公家之租餘以養妻子過此以
往非子之所知也子去矣毋亂我遂不復言子退而
歎之若父者其沮溺之流乎

錦南野人

儒家者流談隱先生居錦南一日錦南野人有不聞
儒名者求見先生謂從者曰吾儕野人鄙不遠識然
吾聞居乎上治國政曰卿大夫居乎下治田曰農治
器械曰工治貨賄曰商賈獨不知有所謂儒者一日
吾鄉人謹然相傳儒者至儒者至乃夫子也不知夫
子治何業而人謂之儒歟從者曰抑所治廣矣其學
之際天地也觀陰陽之變五行之布日月星辰之照
臨察山嶽河海之流峙草木之榮悴以達鬼神之情
幽明之故其明倫理也知君臣之有義父子之有恩

夫婦之有別長幼朋友之有序有信以敬之親之經
之序之信之其達於古今也自始有文字之初以至
今日世道之升降俗尚之美惡明君污辟邪臣忠輔
言語行事之否臧禮樂刑政之沿革得失賢人君子
之出處去就無不貫其趨向之正也知性之本乎天
命四端五典萬事萬物之理無不統其中而非空之
謂也知道之具於人生日用之常包乎天地有形之
大而非無之謂也於是辨佛老邪遁之害以開百世
聾瞽之惑折時俗功利之說以歸夫道誼之正其君
用之則上安而下庇其子弟從之則德崇而業進其

窮而不遇於時則修辭以傳諸後其自信之篤也寧見非於世俗而不負聖人垂教之意寧寧竅餓其身顛躓困厄而不犯不義以爲是心之羞愧此儒者之業而夫子之所欲治也野人曰侈哉言也其無乃誇乎吾聞諸吾鄉之老曰無其實而有其名鬼神惡之雖有其實自暴於外則爲人所怒故以賢臨人則人不與以智矜人則人不助是以君子慎之子從夫子遊而其言若是夫子可知已其不有鬼惡必有人怒乎嗚呼而夫子殆矣吾不願見懼及也奮袖而去

家難

自予得罪竄逐南荒毀謗蜂起口舌譁張禍且不測
室家悵惶使謂予曰卿於平日讀書孜孜朝饔暮飧
卿不得知室如懸磬甌石無資幼穉盈堂呼寒啼飢
予主中饋取具隨時謂卿篤學立身揚名爲妻子之
仰賴作門戶之光榮竟觸憲網名辱跡削身竄炎方
呼吸瘴毒兄弟顛路家門蕩析爲世戮笑至於此極
賢人君子固如是乎予以書復子言誠然我有朋友
情逾弟兄見我之敗散如浮雲彼不我憂以勢非恩
夫婦之道一黜終身子之責我愛非惡焉且婦事夫
猶臣事君此理無妄同得乎天子憂其家我憂其國

豈有他哉各盡其職而已矣若夫成敗利鈍榮辱得失天也非人也其何恤乎

題跋

李牧隱送子虛詩序卷後題

按子虛朴空
中字彌貞齋

道傳奉閼牧隱先生送子虛詩序至其稱子虛曰縝密精切一毫不盡欲然如不得未嘗不一日三復曰維天之命於穆不已是其道體之妙充塞天地貫徹古今其所以流行發見者無一息之間斷而在於人則方寸之間虛靈不昧莫非此道之體與天地周流而無間惟是氣質有偏物欲為蔽此心之靈不能無

操捨收放之時而道之本於吾心見諸日用之間者於是乎有晦明絕續之幾也是以君子之心兢兢業業惟恐一毫之未盡而窒天命之流行無一動之敢慢所以協天行也無一息之敢怠所以順天時也學者而求至於此豈有他哉亦存一毫不盡欲然如不得之心耳充是心而廣之則其戒懼乎不覩不聞之前致謹乎隱微幽獨之際者自不容已日用之間真有以見天理之流行果無一毫之不盡而心亦無所欲然廣大寬平自有不可形容之樂矣抑嘗竊念是道也雖非窈冥恍惚之物而其所以爲微妙者不可

以泛濫求也雖在平常日用之間而其所以遠大者亦不可以卑近得也唯其高明卓絕之士潛波篤至之資然後可與有爲而亦有所達矣是吾道之興喪在於人才而天下之才自古以爲難天也非人之所能爲也牧隱先生主盟吾道以興起斯文爲己任有憂於此其亦久矣今稱達可則曰豪爽卓越子虛則曰縝密精切蓋亦樂得英才深喜之之辭也古人於斯文之興喪未嘗不推之於天而以得人爲難今二子之遇先生天也先生之得二子亦天也先生曰斯文之興子虛旣與其始當與子虛終之是天也吾數

人者聽命於天而已此其所喜者甚至而所期者亦遠矣二子勉矣哉

讀東亭陶詩後序

錦南雜題

自晉至今千有餘年世喜稱淵明爲人予以爲論其世誦其詩則其人可知當南北分裂之際干戈相尋民無寧日內亂將作王室將傾此義人志士有爲之時而淵明則歸去田園而已及觀其詩乞食貧士怨詩飲酒等篇但不勝其憔悴無聊姑託酒以遣耳得稱於後世者如此何歟杜子美曰陶潛避世翁未必能達道觀其著詩集頗亦恨枯槁韓退之讀醉鄉記

以爲阮籍陶潛猶未能平其心或爲事物是非相感發於是有所託而逃焉者也二子爲世名儒善論人物而其言如彼則予之感滋甚今得東亭先生陶詩後序曰憔悴於飢寒之苦而有悠然之樂沉冥於麴蘖之昏而有超然之節伏以讀之不覺歎息曰噫此所以爲淵明也雖去千載之遠如聞其聲歎而接見其容儀也且其憔悴於飢寒之苦沉冥於麴蘖之昏者跡也外也有悠然之樂超然之節者心也內也在外者易見在內者難知安後學未能窺其藩籬也向者韓杜之言特託而言之耳先生曰不然也淵明生

於衰叔之世知其時之不可爲高蹈遠引養真衡茅之下塵視軒冕銖者萬鍾雖衣食不給而悠然樂以忘其憂及乎宗國旣滅世代遷易一時之輩相招仕進若吾淵明則不然拳拳本朝之心如青天白日不事二姓隱於詩酒之中其高風峻節凜乎秋霜之烈不足比也至於其詩當憂則憂當喜則喜當飲酒則飲酒其口夏日長抱飢寒夜無被臥則其飢寒之苦爲如何哉笑傲東軒下聊復得此生則其悠然之樂又如何也其曰春秫作美酒酒熟吾自斟又曰朝與仁義生夕死復何求豈非於沉冥之中而有超然之

節乎蓋淵明之樂不出飢寒之外而其節亦在沉冥之中也何也知淵明不義萬鍾之祿甘於畎畝之中則飢寒乃所以為樂也託於麴蘖終守其志則沉冥乃所以為節也不可以內外異觀也道傳曰命之矣退而書之

題蘭坡四詠軸末

按蘭坡清川伯李居仁自號

予在松京日詣先生之室左右無他物惟琴書在床傍置小盆植松竹梅蘭於其中翫而樂之予惟世俗之於松竹於梅蘭但見其蒼蒼而已粲粲猗猗而已亦知其妙有會於此心者乎方其霜雪霾天火雲爍

空鬱彼松竹挺然獨秀陽德之所鍾也冰崖石裂衆
卉掃地梅萼始敷盈盈馥馥春意之盎然也至若露
曉月夕有香泠然觸于鼻端是則蘭之爲物稟陽氣
之多而其馨香之德可比於君子者也蓋陽者原之
通天地之生意也草木雖微生意發育與此心生之
之理周流無間先生之樂其有得於此乎先生之於
草木愛之篤而養之勤如此况人與我同類而至貴
者乎况志同氣合如雲之從龍者乎今茲觀察于慶
尚也推是心而廣之將使斯民遂其有生之樂熙熙
然如草木之得時雨也無疑矣

題漁村記後

接漁村
孔俯號

可遠權先生爲孔伯共

一本作恭下同

作記宛然畫出一漁

村伯共以朝士號漁村志其樂也伯共不惟樂之於
心而又發之於聲每酒酣歌漁父詞非宮商非律呂
而高下相應節奏諧協益出於自然者也夫樂漁村
者伯共也樂伯共之樂者可遠也道傳聽伯共漁父
詞讀可遠漁村記有悠然而會於心者謂予能樂二
子之樂亦可也嗟乎俯仰此身滄海一粟當與二子
浮雲乎斯世虛舟乎江湖竟不知樂之者誰也嗚呼
微哉三峯鄭道傳宗之書于江月亭

蘭坡四詠後說跋

道傳嘗為蘭坡詠松竹曰方其霜雪霏天火雲爍空

鬱彼松竹挺然獨秀自以為句語作韻語本頗工後

聞挺字乃蘭坡家諱按蘭坡大人思欲改之而難其

字問諸獨谷獨谷微吟古人竹詩曰屹然風霜表色

照乾坤寒予即於言下領其意以屹易挺一作捷雅健

可誦於是表其得於獨谷者俾世之獨學而自以為

是者知有以洗其陋而祛其惑因以自勉焉

題眞贊後

右眞贊二篇陽村權可遠所作也不揚之貌奚足以

辱先生之筆哉而其言有過當者予甚愧焉然從遊
既久則相觀亦深矣其有不可誣者乎崔氏眞贊乃
畫外傳神也於是誌之以示子孫耳

三峯先生眞贊

權近

溫厚之色嚴重之容瞻之如仰高山卽之如坐春
風觀其睟面而盎背者可以知和順之積中也

此言

其容貌

光焰萬丈氣吐長虹方其窮而其志不挫及其達
而其德益崇是其曾次浩然而自得者必有因其
集義以充之者也

此言其氣像

好善之篤處事之通寬弘若河海之廣信果若著
龜之公則其局量規模之大又非迂僻固滯者之
所得而同也

此言其
樞器

若夫性理之學經濟之功闢異端以明吾道之正
仗大義以佐興運之隆文垂不朽化洽無窮真社
稷之重臣而後學之所宗也

此言其學問
事業文章

慶淑宅主眞贊

按慶淑宅主即公
夫人崔氏隰之女

事君子順而義教兒孫慈而厲待親族惠而周撫
婢僕嚴而恕是雖出於天質之美其亦有得於以
德而相與者乎

傳

鄭沉傳

錦南
雜題

鄭沉羅州人也仕州爲戶長善騎射不事家人生產
洪武四年春以全羅道按廉使命奉濟州山川祝幣
航海而去與倭賊相遇衆寡不敵舟中皆懼議將迎
降沉獨以爲不可決意與戰射賊應弦而斃賊不能
逼及矢竭沉知事不濟具袍笏正坐賊驚謂曰官人
也相戒莫敢害沉自投水以死而舟中人皆降賊死
者唯沉而已其鄉人皆惜其死之不幸而愚其果於
自死也鄭先生聞而悲之爲之作傳且曰嗟乎死生

固大矣然人往往有視死如歸者爲義與名也彼自重之士當其義之可以死也雖湯鑊在前刀鋸在後矢石注於上白刃交於下觸之而不辭蹈之而不避豈非義爲重死爲輕歟果有能言之士述之於後著在簡編其英聲義烈照耀人耳目聳動人心志其人雖死有不死者存焉故好名之士甘心一死而不以爲悔今夫沉之死也國家不得知又無能言之士爲之記述以垂於後則沉之忠義與水波而俱逝矣吁可悲也且以子路之賢結纓之事人以爲難沉一鄉曲吏耳而知降賊之不義雖在急迫之時能不失其

正具盛服待死賊人見之凜然莫敢犯則其忠壯之
氣有以折服頑兇之心矣賊既不能害勇於自裁投
之不測之淵無一毫汚染從容就義慷慨殺身雖古
人不及也此皆出於天質之美又非好名之士有所
爲而爲者比也忠義之烈如此而世無知者雖在鄉
黨不過惜其死之愚耳嗚呼誠使人無死則人道滅
久矣當寇敵脅降之時忠臣非死何以全其義當彊
暴侵逼之時烈女非死何以保其節人遭難處之事
能不失其正者幸有一死焉耳以今言之倭寇作患
將三十年于茲族姓士女多被虜掠甘爲僕妾而不

辭甚者爲之行謀指道視其所爲曾徇義之不若而
不以爲愧無他畏死故也其視沉之死爲如何哉且
在平居之時聞人行義常自激昂策勵思效其萬一
至於一朝親履其變畏恟恐懼奪於利害偷生負義
者皆是況不知其死之爲義而以爲愚乎況其死泯
滅而不傳乎嗚呼操行之難而名姓翳然又爲時俗
所侮笑者豈獨沉哉此傳所以作也

行狀

高麗國奉翊大夫檢校密直提學寶文閣提學
上護軍榮祿大夫刑部尚書鄭先生行狀

本貫安東府奉化縣

考檢校軍器監均

祖秘書郎同正英粲

曾祖戶長公美

先生姓鄭諱云敬字

早喪母養於姨母家年一

無年甫十餘自奮于學入榮州鄉校升福州拔鄉校

初至諸生易之及課每捷魁州牧皆器重之從舅氏

翰林安狀原

名奮母之兄

來開京學問日進遊十二徒有

名諸生中大為翰林劉公

名東美

門下贊成事謹齋安

公所稱賞稼亭李公與為忘年交聞東方山水之勝

約先生往觀焉先生欣然不遠千里徒步從之至寧

海府因畱而

一本無而字

讀書凡數年又與故諫議大夫

尹公

名安之

讀書三角山一覽輒記通大義卽止丙寅

月中司馬試至順元年十月宋天逢榜登同進士

二年正月除尚州牧司錄有誣龍宮監務賊罪者按

廉命先生按之至龍宮見監務不問而還曰吏之貪

汚雖曰惡德非才足以弄法威足以畏人者不能濟

今監務老耄不能任人何畏而行賂乎使

一本使上有按廉二字

果知其誣歎曰近來官吏皆以苛察爲能司錄誠

長者也州人有宦者得幸天子奉使來入州欲加先

生以非禮先生卽棄官去吏士號哭于道宦者慚懼
夜追至龍宮郡血頰謝請還三年四月入典校爲校
勘四年三月注簿閏八月郎階一作皆兼都評議錄事
時院使張海奉御香使國家命先生爲接伴錄事使
愛江陵妓與之偕先生入啓事妓與使共席坐自若
先生叱下之使愠怒已而慰諭先生醜之辭還五年
九月遷三司都事六年十月除通禮門祇候至正原
年六月典儀注簿階皆承奉郎二年八月加德直郎
弘福都監判官三年 月出知密城郡事時宰相趙
承暉以密人有負債者託御香使安祐移文本郡徵

之先生寢其事不行密候吏見使馳入金海府以不

及郊

一本無郊字

迎筇府使奔還與長吏入白金海府使

無故見辱今不從命辱且不測先生不聽一邑危之
使入郡禮畢問前有移牒如何先生曰密人苟有負
債者趙自徵之非相公所空問使怒令左右圍之先
生正色曰今郊迎舞蹈奉迎天子之命何以罪我相
公不布德音以惠遠民敢爲是與使訕而止及代先
生以公幹在外不入郡卽去密人以月俸所當入贐
行夫人不受四年九月遷福州牧判官戶長權援嘗
同遊鄉校下車之夕持酒有求謁先生召與坐飲酒

謂曰今與若飲酒不忘舊也明日有犯法判官不汝貸也州僧正於甕川驛路爲賊所害性命僅存驛吏見之問其故僧正曰予賣布若干疋入某人家見糞田役人飲酒到某處見人耘田去許多步有人自後厲聲曰我耘田者呼與語不應何也未及對卽擊之奪布而去吏扶入人家未幾死吏執耘田者告于牧耘田者服罪獄成時先生自外還曰殺僧正者恐非此人牧使曰已服矣先生曰愚民不忍鞫問之苦恐怖失辭耳牧使曰公明處此吾不知也先生問糞田主曰吾聞汝饗役人之日僧正出有言及僧正布者

毋隱糞田主白有一人在座曰僧正布可充酒價於是拘其人及其妻以來置其戶外先鞫其妻曰吾聞某月日而夫歸汝布若干疋渠謂從何得之妻曰某月日夫以布歸曰借布者還之問其人借一本借下布字者誰毀其人辭屈伏罪牧使邑人驚問之先生曰大抵盜賊秘其蹤跡唯懼人知其曰我耘田者詐也五年月入爲三司判官六年十月拜奉善大夫書雲副正是年冬充賀正使書狀官朝燕京時奇氏寵專宮掖中貴多東人持酒饌來饋頗倨傲先生正色曰今日之饋爲舊主也中貴愕然曰教我矣子大秀才

也七年三月成均司藝十二月加奉常典校副令直
寶文閣知製敎八年二月出按楊廣道九年十月按
交州道風采所臨州郡肅然其按楊廣也稼亭請掃
先塋歸韓州先生造謁焉笑語如布衣時先生醉臥
顧稼亭曰吾等可謂達矣稼亭曰予位四宰然猶有
居上者在子僅得按廉秩四品敢言達乎先生曰盍
思東遊時乎稼亭大笑十年四月典儀副令十一年
正月典法摠郎獄無冤滯按麗史本傳曰轉典法摠郎恭愍即位以云敬與佐郎徐浩守法不為權貴所撓召入內殿賜酒尚書玄慶言曰兩宮寢殿地禁甚嚴今外人出入無制宮殿司門宦寺之職今使忽赤守之視事之時陞衛宜謹今左右如市奏事未了已洩於外掌刑之官不可昵

近今鄭云敬徐浩賜酒
寢殿皆戾古制王然之
十二年九月又出爲全州牧

使借奉順大夫判典校寺事時春夏之交旱甚上官
日大雨吏民悅前此有僧娶妻居家一日出外被傷
死山路其妻狀訴于牧無證久不決先生上官其妻
又來訴卽鞫其妻有所私者妻曰無之但鄰有無妻
男嘗戲妾曰老僧死則事諧矣於是卽拘其男及其
其字一本無母以來置男外鞫其母曰某月日而子爲在
家歟出外歟母曰是日男自外而來曰予困矣與友
人飲酒醉卽問其男所與飲酒者爲誰其男辭屈果
殺僧者也時有一本無時御香使盧某暴橫甚所至

陵辱守令疾馳入州罪以不及郊迎先生引禮不屈
即日棄去父老號哭使亦愧服畱之不得後累有朝
命竟不赴丙申七月召爲中散大夫兵部侍郎掌武
班銓選注擬平允九月奉西海道察訪兼軍須之命
時當兵興之初糧餉爲急先生輸粟數十萬一本萬下有解
字期月事集國家督諸道引西海爲辭至正十七年
二月加中大夫秘書監寶文閣直學士四月存撫江
陵兼朔方道採訪使朔方州郡久沒女真疆域未分
兵革遽起人民流散先生辨疆域制民產不失土空
民以爲便父老數百人狀薦于朝至今稱之七月除

大中大夫十八年二月以本職知刑部事訟事有自
都評議使下先生謂宰相曰式序百官能者進之不
能者退之宰相事也至於法守各有司存事事皆由
廟堂是侵官也訟者輻湊先生聽之初若不經意者
及兩造俱訟剖析精當勝屈皆稱其平玄陵嘉之十
九年三月超授榮祿大夫刑部尚書二十年冬玄陵
南巡先生追至忠州上謁玄陵大悅引見慰勉之二
十三年七月除奉翊大夫檢校密直提學寶文閣提
學上護軍從其便也二十五年冬謝病歸榮州二十
六年正月二十三日乙巳病卒于家壽六十二附葬

于先墓之域在榮州治東十里是年冬十二月十八

日夫人禹氏卒

按圃隱奉使藁序曰奔父喪榮州居二年繼有母喪凡五年兩說必有一

誤附之榮州士族散員淵之女也先生平日不事家

產於世利淡泊如也客至必置酒夫人不計有無隨

空饌具以順親賢友善之意焉男三人曰道傳壬寅

科進士今為宣德郎通禮門祇候

按公乙巳為通禮門祇候而此曰今

為通禮門祇候可疑

曰道存道復皆讀書女一人適士人黃有

定成均司藝瑾之子也孫二人津澹

一本皆幼男道

傳謹狀

墓表

廉義之墓

有原至正二十六年高麗檢校密直提學鄭先生卒

于榮州之私第其年正月乙巳葬榮州

按鄭尚書卒於丙午正月

二十三日乙巳而此曰其年正月乙巳葬榮州兩說必有一誤

治東十里附先塋也

友人星山宋密直福州權檢校相與議曰生則字以

表其德沒則諡以著其節古也然爵不應諡則朋友

諡之若陶淵明之稱靖節徐仲車之稱節孝是也先

友鄭先生早擢顯科揚歷華秩可謂達矣而家無宿

貲妻子未免飢寒處之淡如也其廉矣乎於朋友少

有患難以身任救恤之責非其義雖有公卿之勢視

之蔑如也其義哉於是題其墓曰廉義先生

祭文

哭潘南先生文

并序。此下二首錦南雜題。按辛禍乙卯朴公尙衷與公請

却北元使遂得
罪杖流道死

噫乎先生乎先生之生也人疑之先生之死也人益
疑之俗賈利口其巧如簧時尙詭隨其柔如韋先生
不然簡默無言先生守正不與時推移小人以此疑
先生為訥為魯簡賢附勢無人不和利祿所在舉世
爭趨先生不然寧餓死溝壑而吾不苟得寧終身卑
賤而吾不安求此為善雖在傭丐之微好之如芝蘭

彼為惡雖在趙孟之勢疾之如仇讎小人以此疑先生為逆為妄當其死也人皆畏死而重生蒙恥冒辱送出哀鳴先生不然吾義之安於死也寧觸虎狼之口吾不負義以求活也吾身可殺也吾道不可屈也小人以此疑先生之戇也君子則曰先生之有道也可以尊主庇民而不得行於世先生之有學也可以貫穿古今而不得信於人義色凜然而羣小以慍忠言直切而上不以聞以此疑先生命之戾而時之屯也先生之為善也可以福祿永終而不得享其壽可以遺慶後嗣而不得保其身以此疑先生之不幸也

予則以為彼之疑皆非也皆不知先生者也道之行
不行時也死生禍福非在已舊本作器者也先生於此將
何為哉行吾義而已矣先生之生也吾信之先生之
死也吾益信之先生不與貪鄙者同貴不與姦佞者
同生則其死乃所以保其身其不貴乃所以為榮也
而又何疑乎然則何哭乎哭斯民之不被先生之澤
也哭吾道之無所託也哭吾輩之無所取則也非哭
死也為生者哭也哭曰

嗚呼先生兮已而已而丁時不淑兮人莫我知閔時
世之嶮巇兮不忍默默以無言曾微軀之幾何兮橫

抑河海之狂奔遭漂溺而莫救兮竟墮其生人以此
議先生兮卒得狂名我苟得其所兮中心孔寧惟賢
達之卓軌兮亮愚昧之難明吾輩負義以偷活兮徒
遑遑其疇依嗟面目之有覩兮內已羞而懷悲嗚呼
九原如可作兮惟吾先生之與歸

謝魑魅文并序

會津多大山茂林僻近於海曠無人居嵐蒸瘴泄易
陰以雨其山海陰虛之氣草木土石之精薰蒸融結
化而為魑魅魍魎非人非鬼非幽非明亦一物也鄭
先生獨坐一室書永無人或時投策出門負手避觀

則山川糾紛草木相接天陰野暝滿目蕭然陰氣中
人支體沉困於是還入其室煩鬱憤懣倦極就睡低
頭瞑目若寐非寐向之所謂魑魅魍魎之屬相與擲
揄作擲揄一本憂嬰往來歛翕有若喜者有若悲者有
若笑者以跳踉衝冒偃仆蕩倚先生厭其煩聒又惡
不祥舉手驅去去而復來不勝其怒高聲大叫則忽
然而覺因作一本以形消跡滅廓爾無物先生神悸氣
恐如有所喪久而後定凝神靜慮肅氣細息假寐而
坐復有其物援朋引類索索而至若前所為先生曰
爾陰物與我不同類曷為而來且爾曷為而悲曷為

而喜笑乎語訖若有進而言者曰通都顯邑第宅相望冠蓋日遊人之所居也幽陰之墟荒絕之野魑魅之所滋也子來卽我耳非我卽子也何以去我子不量力觸諱犯忌見黜明時茲非可笑歟力學篤志徑行直遂終罹禍謫無路自明亦可悲已伏陰處幽世莫我知而子之學鉤深探賾無微不至而得相從於荒陬裔壤之中是則可喜也且子不得齒於平人見放在遠遇子者目動語子者心怵皆搖手却立掉臂背行惟我等喜子之來與之從遊今以非類斥之舍我其誰與為友哉先生於是愧其言且厚其意謝以

文辭曰

山之阿兮海之陬天氣靈陰兮草木以幽曠無人以
獨居兮舍爾吾誰與遊朝出從兮夕共處或歌以和
兮春復秋既違時而棄世兮曷又何求蹢蹢草莽兮
聊與爾優遊

祭文僖公文

代人作○按文僖公即柳叔公之
座主代淑之子密直副使實作此

文○
乙丑

嗚呼有昊天德而不能報有窮天之憾而不能釋

按恭愍戊申柳淑論辛丑
被死耽縊殺于靈光郡

不肖孤所以痛心而泣血

也而又行高於一世而不能紀功在於王室而不能

白則不肖孤尤得罪於名教也惟我先考當玄陵潛
邸之日間關萬里身負羈縶及王定位東還于國入
掌樞機昵侍帷幄從容參贊多所裨益變故相仍禍
亂屢作不避危險苦心焦力以濟艱難此功在王室
者也間言一入抽身而出泥塗其軒冕獎庭其爵祿
欣然若將終身無纖芥之形於辭色至於死生之際
確乎有不可奪之節其行可謂高於一世矣自先考
之逝日月倏忽至十有八年之久而誌墓之石始刻
不肖孤稽緩之罪不以是而免也而先考之行之功
幾泯而復存豈非幸之萬一哉卜于吉日埋此碑石

先考有知歆我明酌

策題

會試策

問自古言善治之道者必有成法以爲持守之具其所以養國脉淑人心傳作累世者皆由於此不可不慎也若稽有虞秩宗典禮士師明刑成周宗伯掌禮司寇掌刑以致雍熙隆平之治其詳可得而言歟其命官也同其列職也等禮與刑果無輕重歟至漢叔孫通制禮蕭何定律亦何所本歟縣最之儀識者譏之畫一之法得清靜寧壹之效唐太宗制貞觀禮書

布之中外又聽任德不任刑之說有貞觀太平之或
是漢之治由於刑法而唐之治本於德禮也先儒曰
漢之大綱正唐之大綱不正者何歟所謂德禮者非
大綱乎恭惟主上殿下以聰明之德勇智之資應
天順人肇造丕基不以勢位爲高而常懷雍雍肅肅
之敬慈祥惻怛之念謹禮恤刑之本於是乎立矣爰
命攸司考古今禮典之文而損益之譯朝廷頒降之
律而開曉之禮可謂定而刑可謂明矣然其喪祭之
制果合於先王之舊而無淫祀浮屠之雜歟其制軍
也果得蓄將教兵之法而武備不至於弛歟謂宴享

得鹿鳴和樂之意婚姻得附遠厚別之義而無習俗
之陋可乎貪墨非不戢也暴亂非不禁也而作姦犯
科者或有之其故何歟豈有司不體吾君之意視
禮刑爲文具而奉行之未至歟抑承前朝紊亂之餘
獎習已甚而未易革歟伊欲俾斯禮秩秩乎其文繩
繩乎其典上自宗廟朝廷下至閭巷鄉井絜然有
文以相接懽然有恩以相愛俾斯刑井井乎其可辨
也鑿鑿乎其可行也上不避乎貴勢下不陵乎柔弱
期至於無刑同歸于至治其道何繇諸生以明體適
用之學待有司之問久矣其悉著于篇

殿試策

王若曰惟予寡昧荷祖宗積累之德膺臣民推戴之心獲登寶位任大責重罔知攸濟良用惕然仰惟前代是憲期致小康稽之於書曰文王自朝至于日中是不遑暇食用咸和萬民又曰文王罔攸蕪于庶言庶獄則宜若無所事事矣其曰不遑者何歟自古為人君者莫不以勤勞得之逸豫失之然徒知其勤而不知所以為勤其弊也失於苛察而無補於治矣然則人君之所當勤者抑何事歟予每當聽政惟恐一事之或廢然萬幾至繁何以辨其當否而處之無

失歟孜孜訪問惟恐民情之鬱於下何以使聰明益
廣而無所蔽歟至於修令惟恐反汗而不行何以合
於公理而使民懷服歟子大夫講明經學博古通今
其必有能言是者矣毋泛毋略悉心以對予將採擇
而用之矣

銘

竹窓銘

并序○以下二
首錦南莊題

三峯隱者見彥暢父李先生問曰子號竹窓然乎夫
竹其心虛其節直其色經歲寒而不改是以君子尚
之以勵其操至於詩以興君子生質之美學問自修

之進則其所托者深矣古人之取於竹非一敢問所
安先生曰未也無甚高論且竹春宜鳥其聲高亮夏
宜風其氣清爽秋冬宜雪月其容灑落至於朝露夕
煙晝影夜響凡所以接乎耳目者無一點塵俗之累
予於是早起盥淪坐竹窓淨几焚香或讀書或彈琴
有時撥置萬慮默然危坐不知吾身之寄於竹窓也
噫先生之樂不在竹但得之心而寓之於竹耳請以
是銘之

有闢其窓有鬱者竹君子攸宇其貞如玉左圖右書
閱此朝夕不物於物維樂其樂

河浩甫字銘

并序

梅河公字浩甫求其銘於三峯隱者隱者曰物之
在天地間何莫非是氣之所發見然其至切而易見
者莫如水水之行也流通而不息其勢也滔滔汨汨
浩然而莫能禦其至也必放乎海而後已是孰使之
然歟易曰天一生水其生也最先其去本也未遠卽
水之所以爲浩然者乃氣之浩然也公字浩甫其取
於水歟取於氣歟觀公所樂與所養可知也銘曰
氣烏乎養義也水烏乎樂智也智圓而義方斯其所
以爲君子也歟

贊

趙政丞 浚直贊

於惟我 后廼有重臣重臣伊誰趙公惟賢志存經
濟拯世之屯手扶日轂昇于中天功在王室澤被生
民雖古名相莫能或先惟公之心惟公之真與國匹
休於千萬年

又


其望之也巖然嶽峙登然淵渟其卽之也溫然玉潤
藹然春陽孰其狀之炳煥丹青功高開國位冠端揆
其事君也堅確之節夷險不貳其愛民也生育之心

歸乎厥施見惡如病嗜善如飢自厥以正人不

謂

非佞多士是儀

三峯集卷之四





卷一

卷一

卷一

卷一